

# Carta nú uquie'e San Pablo lubee bene Roma enu nzeli arqui' Jesucristo

<sup>1</sup> Li'á Pablo, enu sibi' lu Jesucristo, Diose ucañi li'á nú aca apóstol'nu para nú ixiule'a bedichia' nze'ca'nu lubee bene. <sup>2</sup> Hasta hua'tu, bee bedichia' nze'ca quie' nze'tae lu ichi' Stichia' Diose nú uquie'e bee profeta'nu. <sup>3</sup> Bee bedichia' nze'ca quie' rni equie cuenda' Jesucristo enu rnibiy'a lua'ahua nu chenu ube'tanu lu iliulabe ungulanu lubee familia' tuxie David, <sup>4</sup> pero equie cuenda' Espíritu Santo necanu lli'ñi Diose xne uhuañi zecanu lu eluti, nu chiqui' rlu'cunu poder.

<sup>5</sup> Nu equie cuenda' Jesucristo ucañi Diose li'á nú necaa apóstol'nu para nú ixiule'ahua stichia'nu lubee bene, nú chili arqui'beella stichia'nu nu zucu' beellae xne seca beella li'inu. <sup>6</sup> Nu le'ca nuuhua nebacu'la Diose leta bee bene enu ucañilanu, para nú acahua bee bene' Jesucristo.

<sup>7</sup> Enze'e rquie'a carta quie' luyehua enu seca Diose, li'ihua bee enu nucua'a Roma, li'ihua enu ucañila Diose nú acahua bee bene'nu. Diose Pañibe cuna Jesucristo enu rnibiy'a lua'ahua ri'inu nú cha nze'ca lucuenda'hua nu ñia tsu arqui'hua.

## *Niarqui' Pablo nú challa Roma*

<sup>8</sup> Rluti nia che'tsa lu Diose equie cuenda' Jesucristo lucuenda' yehua xne yebee luhuare rni bee bene nú xa nzeli arqui'hua Jesucristo. <sup>9</sup> Nu

diquinu' arquia sibi'a lu Diose nu rixiule'a bedichia' nze'ca' lli'ñinu Jesucristo lubee bene, nu li'inu nediya'nú siempre rnacua lunu equie cuenda' li'ihua chenu rnacua lunu. <sup>10</sup> Siempre rnacua lu Diose para nú nu' modo nzelabi'ya li'ihua tucu nú rri'iá elliebacu'. <sup>11</sup> Xne nu' ana arquia nzelabi'ya li'ihua para nú ri'iá elietsa luhua lu cuenda' Stichia' Diose, che tsuta'lá arqui'hua lu stichia'nú. <sup>12</sup> Nu para nú ri'ihua elietsa lua nu ri'iá elietsa luhua equie nú xa nzeli arquia'ahua Diose nu scua dua'ahua ana arqui'sa'ahua. <sup>13</sup> Bee sa'a enu nzeli arquia'ahua Jesucristo niarquia nu ri'ihua beya' nú huaxi bese niarquia nzelabi'ya li'ihua, para nú dalalá bee bene enu chili arqui' Stichia' Diose letahua tucu nú unga lubeelá bee eyeche elu uya'la pero hasta nee lá llu'cha yela bi'ya li'ihua. <sup>14</sup> Xne cuendaa neca nú ixiule'a Stichia' Diose lu titse bee bene, sia lubee bene griego urre lubee bene enu la neca bee bene griego, lubee bene enu laca urre lubee bene enu reca. <sup>15</sup> Enze'e chiqui' nu' ana arquia nzelabi'ya li'ihua para nú ixiule'a bedichia' nze'ca' Diose luhua enu nucua'a eyeche Roma.

### *Elurnibiya' nú rlu'cu Stichia' Diose*

<sup>16</sup> Nu la tua rixiule'a bedichia' nze'ca' Jesucristo. Xne bedichia'cua' rlu'cu poder' Diose. Para nú yebee bene enu chili arqui' li'inu tsila'a beella, nu rluti bee bene Israel nu chelá bee bene enu la neca bee bene Israel. <sup>17</sup> Xne equie cuenda' bedichia' nze'ca' Jesucristo rri'i bene beya' nu lunú nzeli arqui' bene Jesucristo la lu'cu bene dula lu Diose tucu nú nequie lu ichi' Stichia' Diose:

“Nu bee bene enu la lu'cua' dula equie nú nzeli arqui'beella li'inu huañi beella diqui tiembu.”

*Ye bee bene necha rri'i*

**18** Lia'ahua nediya'ahua nú enza liñibe nze'ta castiya' Diose nu chiqui' juerte zeca bee bene enu la zucu' stichia'nu nu la ri'i tucu nú necane nu equie nú nehuañi bee scua rca nucua' nú chulu bee bene Stichia' Diose. **19** Nu li'ibeei nediya'la'beeí nú nu' Diose, xne ulube'nu lubeei nú neli nu' Diose. **20** Añinzuca nú la lañi' bene Diose pero desde chenu ungache' iliulabe rlañia'ahua ye nú ureche'nu, nu equie cuenda' ye nú ureche'nu rria'ahua beya' nú leca xunga laxu poder nú rlu'cunu, nu li'inu necanu Diose, enze'e leca modo nú cachi' bene nú nu' Diose. **21** Añinzuca nú nediya' bee bene nú nu' Diose pero la lu'cu bene ula'na lu Diose tucu nú rialane nu la dete' bee bene che'tsa lunu, sino que rri'itsia bee bene puro beenú necha neca, nu che neca xi neca nú nucua'abeei leta rula'. **22** Rnibeei nú chiqui' recabeei pero máse netundubeei. **23** Xne luhuare nú lu'cu bee bene ula'na lu Diose liñibe enu leca xunga ati, li'ibeei rlu'cubeei ula'na lubee diose enu la nehuañi, enu nuya' forma' bene, cuna bee nañi xi neca be'lá cuna iñi, cuna bee nañi enu rlu'cu tacu cuchiu'.

**24** Enze'e utsana' arqui' Diose li'ibeei nú necha rri'ibeei, nu netú na nú rri'inubeei sa'bee, **25** luhuare nú chenalabeei Stichia' Diose nú neli neca, a'la nzenalabei bedichia' nú la neli neca. Nu rlu'cubeei ula'na lubee nú ureche' Diose, nu la lu'cubeei ula'na lu li'inu enu ureche' bee nucua', nu lu li'inu riala nú lu'cu bee bene ula'na diqui tiembu. Amén.

<sup>26</sup> Enze'e utsana' arqui' Diose li'ibeei nú rri'ibeei nú necha neca. Nu huaxi bee una'a la ria' tucu nú neca beenchu una'a, sino que niarqui' beenchu le'ca sa' una'a beenchu. <sup>27</sup> Le'ca scua nu' bee niyu enu la na'tsea' bee una'a, sino que riu'u arqui'bee le'catsia sa' niyubeei, nu puro nú necha neca rri'ibeei elliebacu' lusa'bee. Niyu cuna niyu rri'i bee nú netú neca. Che le'ca li'ibeei rla'na bee castiya nú zecabeei.

<sup>28</sup> Nu lunú lá ri'i caso bee Diose, enze'e utsana' arqui'nu bee lu elliebacu' nú necha neca rri'ibeei para nú ri'ibeei lunú la yala ri'ibeei. <sup>29</sup> Puro nú necha neca rri'ibeei, rlu'cube stucu una'a nu rlu'cube una'a stucu niyu, huaxi nú necha neca rri'ibeei, rle'bee lu'cusca'lábee stene'bee, riaa arqui'bee, ruuti bee bee bene, rliunubeen bee bene, nezequiebee, puro nú necha neca nzucu lubeei rri'ibeei, nu puro rnibeei lu cuenda' bee bene. <sup>30</sup> Le'ca se'tabee bee bene, nu rlebee lu Diose, la lu'cube ulá'na lubee bene, secabeei nú chiqui' recabeei, nu nelliñabeei, <sup>31</sup> chiqui' nzitibeei nu la tsalubeei stichia'bee, nu lecalí ti zecabeei, nu la hua'a arqui'bee bee bene. <sup>32</sup> Nediyal'a'bee nú uni Diose nú bee bene enu rri'i scua rqui'ña nú zecabeei, castiya' Diose, añinzaca nú nediyabeen nucua' nu chu rri'isca'lábee scua, nu hasta ñia nzu arqui'bee chenu rlañi'bee nú stucu bee bene rri'i scua.

## 2

*Rlualu Diose tucu nú necane lu cuenda' bee bene*

<sup>1</sup> Enze'e la yala nú tsequichia'lu bee bene, tunu rri'ilu scua sequichia'lu le'catsia li'ilu, xne rri'ilu tucu nú rri'ibeei. <sup>2</sup> Pero lia'ahua nediyahua

nú tucutsia Diose rlualu tucu nú necane chenu rdete'nu castiya lubee bene enu rri'i beenú necha neca, nú unila luhua. <sup>3</sup> Nu li'ilu enu sequichia' nú xneca rri'i bee bene nu le'ca esquie rri'ilu, la ri'ilu elliebacu' nútia tsila'alu lu castiya' Diose. <sup>4</sup> Li'ilu rluachulu nú ñia rri'i Diose lulu, rluachulu lunú rua'a arqui' Diose li'ilu, nu rlu'cu arqui'nu li'ilu nu la ri'ilu beya' nú lunú rlu'cu arqui'nu li'ilu scua. necane nú rlu'culu tiempo nú che'e arqui'lu lu stulalu. <sup>5</sup> Pero li'ilu chiqui' nzitilu nu la niarqui'lu che'e arqui'lu lu stulalu, nu le'catsia li'ilu rri'ilu nú recahuaxilá stulalu para bichia chenu dete' Diose castiya bee bene nu hualu Diose lu cuenda' bee bene li'nu enu rlualu tucu nú necane. <sup>6</sup> Bichia ze'e dete' Diose lunú riala cada tucua bene lunú xneca uri'illa. <sup>7</sup> Nu bee bene enu la tsana' arqui' nú rri'i nze'ca nu rla'na eluxene nú nu' liñibe, nu rla'na nú huañi nze'ca lu Diose para nú lu'cu bee nze'e cuerpo nú la nitilua' nu dete' Diose elunehuañi nú leca xunga laxu lubee nze'e. <sup>8</sup> Pero bee bene enu la zucu' Stichia' Diose chiqui' rlenu lubee nze'e nu dete'nu castiya bee, xne luhuare nú chenalabeei stichia'nu nú neli neca, nzenalabeeeinziu nú necha neca. <sup>9</sup> Chiqui' nehuana zeca bee nu cuu arqui'bee lunú rri'i bee nú necha neca, sia bee bene Israel nusia bee bene enu la neca bee bene Israel. <sup>10</sup> Pero yebee bene enu rri'i nú neca nze'ca ñia nzu arqui' Diose lubeei, nu rri'inu nú la chenu arqui'bee nu chu'ubeei liñibe, sia nú necabeei bee bene Israel nu sia nú lacabeei bee bene Israel.

<sup>11</sup> Xne teriallu rri'i Diose tucu nú necane luye bee bene. <sup>12</sup> Yebee bene enu la chulu ley' Diose nú udete'nu lu Moisés nu rri'i dula, la chiulue

lu cuenda'lla tucu nú rni ley cua', pero ye bee bene enu nu'lu ley cua', tucu nú rni ley cua' esquie chiu'ulue lu cuenda'lla. <sup>13</sup> Xne la neca lunú riene'tsia bee bene ley cua' nú la lu'culla dula lu Diose sino que bee bene enu sucu' nú rni ley cua' bee nze'e neca enu la lu'cu dula lu Diose. <sup>14</sup> Pero bee bene enu la neca bee bene Israel nu rri'i nú neca nze'ca sin nú chulubeei ley cua', nu rri'ibeei tucu nú rni ley cua' sin nú chulubeei, sino que elliebacu' e'cubebei xiu'u nú neca ley' beei, <sup>15</sup> xne lunú xneca nehuañihua rlube' nú elliebacu'hua xiu'u ta nú neca nze'ca nu ta nú la neca nze'ca rri'ihua, luhuare nú rlu'cuhua ley cua', nu le'ca mismo li'ibeei ri'ibeei beya' chenu rri'i nze'cabeeiurre chenu la ri'i nze'cabeei. <sup>16</sup> Scua aca bichia chenu hualu Diose lu cuenda' ye beenú a'chi' rri'i bee bene equie cuenda' Jesucristo tucu nú rni stichia'nu nú rixiule'a.

### *Bee bene Israel cuna ley*

<sup>17</sup> Nee li'ihua enu neca bee bene Israel, nelñiahua nú necahua bee bene' Diose nu cuna nú recahua ley nú udete' Diose lu Moisés. <sup>18</sup> Nu rnihua nú nediyahua xa niarqui' Diose nú huañihua nu equie cuenda' ley'nu rri'ihua beya' ta nú neca nze'ca ri'ihua. <sup>19</sup> Nu secahua nú acahua nihua lubee bene enu laca ley cua', cuna lubee bene enu lachulu Stichia' Diose. <sup>20</sup> Secahua nú li'ihua acahua zete'huá bee bene enu lecalí xi reca cuna bee bene enu lle'natsia reca, xne equie cuenda' ley cua' recahua nu nu'luhua ye nú neli neca. <sup>21</sup> Pero scua tucu nú nehuañihua, ¿xiquienú mejora la zete'xuhua li'ihua nú xneca huañihua luhuare nú rnihua lubeelá bee bene nú xneca huañibeei? Xne li'ihua rnihua nú la neca nze'ca nú ri'i

bene eluhuana', ¿nu xiquie nú rri'ihua eluhuana'?  
 22 Rnihua nú la neca nze'ca nú lu'cu niyu stucu una'a nu la lu'cu una'a stucu niyu, ¿nu xiquie nú rri'ihua scua? Le'ca rana arqui'hua bee diose enu ureche' bee bene nu, ¿xiquie nú rcachi'hua liñi indu elu nchiucu' bee diose cua? 23 Chiqui' nel-liñiahua nú recahua ley pero sa'na netúhua Diose equie nú la zucu'hua nú rni ley. 24 Enze'eca rni lu ichi' Stichia' Diose: "Bee bene enu laca bee bene Israel se'ta beei Diose equie cuenda' nú rri'ihua."

25 Neli nú sibi' nú rquie seña elunecachi' bee niyu, tunu zucu' bee bene ley nú udete' Diose lu Moisés, pero tunu la zucu' bee bene tucu nú rni ley cua' lecaxi zibi' nú nequie seña elu necachi' bee bene che. 26 Pero tunu tucu bene enu la nequie señacua' elu necachi', nu sucu'lla tucu nú rnibiyá' ley, necalla xi neca tucu bene enu nequie seña, mase nú la nequie señalla. 27 Nu bee bene enu la chulu ley' Diose nu sucu' stichia'nu nu nehuañi xi nehuañi enu nu'lü ley, che mase nú la nequie señalla tucu nú rnibiyá' ley, pero lunú nu'lulla Stichia' Diose, che lunú xneca nehuañilla ri'ihua beya' nú la nehuañihua tucu nú riala nú huañihua, equie nú la ri'ihua tucu nú rnibiyá' ley' Diose mase nú nu'luhua ley cua' nu nequie señahua. 28 Xne la neca lunú rala bene lu iliu Israel nú necalla bene Israel, nu la neca lunú nequie señalla nú necalla bene Israel ante Diose. 29 Sino que enu neli neca bene Israel neca bee enu diquinu' arqui' sucu' stichia'nu nu la neca nú nequietsia señalla, nu ni' nú sucu'lla beelá bee custumbre nú rlu'cu bee benecua', sino que necane nú nzu Espíritu Santo cuna bee bene, nu bee bene enu nehuañi scua

Diose neca enu sucu' aya li'illa, nu la neca bene enu sucu' aya li'illa.

### 3

<sup>1</sup> Nu, ¿xi sibi' nú neca bene bene Israel? ¿Nu xi sibi' nú rquie señacua' bene? <sup>2</sup> Chiqui' neca equie nú neca bene bene Israel ye modo, xne rluti udete' Diose stichia'nu lubee bene Israel. <sup>3</sup> Neequie la ri'ihua elliebacu' nú lunú nu' bee enu la chenala Stichia' Diose, chequie la tsalua' Diose stichia'nu tucu nú unilanu. <sup>4</sup> Xne Diose leca xunga xe'enu stichia'nu, mase nú ye bee bene iliulabe nequichia' pero Diose leca xunga nequichia', tucu nú rni tucu luhuare lu stichia'nu:

Yebee bene lañi' nú li'ilu sa'alulu stichia'lu, nu lecati niquiya xi niquiya lu cuenda'lu.

<sup>5</sup> Pero nu' bee bene iliulabe enu rri'i elliebacu', nú equie cuenda' dula nú rri'illa, scua rlube'lla nú ñia neca Diose, nu ¿xiquie nú necha neca Diose nu rdete'nu castiya bee bene? <sup>6</sup> ¡Lacane scua! Xne tunu necha neca Diose, ¿xneca modo nú hualunue lu cuenda' bee bene iliulabe che?

<sup>7</sup> Xne te zucua'ahua nú tunu beenú la neli rnia sibi'i para nú lu'culá bee bene ula'na lu Stichia' Diose, che leca' modo nú ni Diose nú rlu'cua dula.

<sup>8</sup> Nu le'ca teri'ila'ahua beenú necha neca para nú cha nze'cae lu cuenda'ahua, tucu nú rta' quiya bee bene li'á, nú setea bee bene, la chenu arquia'ahua nucua', xne Diose dete' castiya bee bene enu rni scua, nu scua riala zeca bee.

#### *Lecati neca bene nze'ca*

<sup>9</sup> Bueno che, ¿xie' lianú neca'ahua bee bene Israel nú neca'ahua bene nze'ca luquela bee bene enu laca bene Israel la? ¡Pero la acane esque!

Xne sia bee bene Israel nu sia bee bene enu laca  
bee bene Israel rlu'cu dula. <sup>10</sup>Tucu nú rni lu ichi'  
Stichia' Diose elu rni:

Leca ni' tucu bene nze'ca, pero ni' tuculla leca.

<sup>11</sup> Ni' tucu bene la yene',

nu ni'tucu lecati la'na Diose.

<sup>12</sup> Yebee bene utsana' arqui' Diose,

nu yella rri'illa nú necha neca,

lecalí ti rri'i nú neca nze'ca, leca ni' tuculla.

<sup>13</sup> Xi neca tucu eluhua nú na'la ru'u neca bene,

nú puro nú laca neli rni bee bene,

nu bee bedichia' nú rni bee bene neca xi neca  
benenu' be'la.

<sup>14</sup> Puro bedichia' nú necha see xiu'u ru'ubeei,

nu puro bee bedichia' chi'qui' rnibeei.

<sup>15</sup> Nu nzucutsia lubeei nú útibeei bene.

<sup>16</sup> Nu catse elu nzuebeei puro nú necha neca  
rri'ibeei,

nu nehuana seca bee bene rri'ibeei.

<sup>17</sup> La chulubeei nú huañi nze'ca beeii tucu nú ri-  
alane para nú nzuxe arqui'beei.

<sup>18</sup> Nu ni' la za' arqui'beei nú lliquibeei Diose.

<sup>19</sup> Nediya'ahua nú ye nú rni ley necane para  
bee bene enu sucu'e, para nú lecati ni nú la chulu  
dula, sino que yebee bene ri'ibeya' nú rlu'culla  
dula ante Diose. <sup>20</sup>Xne la neca nú sucu'tsia bee  
bene ye nú rni ley nú secalla nú la lu'culla dula lu  
Diose sino que ley cua' sibi' para nú ri'i bee bene  
beya' nú rlu'culla dula.

*Rlu'cu cuenda Diose bene equie nú nzeli arqui'  
bene Jesucristo*

<sup>21</sup> Pero nee ulube'la Diose inziu'nu lua'ahua  
para nú xneca ya'na nze'ca'ahua lu Diose la  
necane equie nú ria'ahua lunú xa rnibiya' ley sino

que equie cuenda' ley cua', nu equie cuenda' nú uquie'e bee profeta' Diose, <sup>22</sup> rria'ahua beya' nú Diose rlu'cu cuenda lia'ahua, nú la lu'cua'ahua dula equie nú nzeli arquia'ahua Jesucristo, scua rri'inu luyebee bene enu nzeli arqui' li'inu. <sup>23</sup> Xne yebee bene rlu'cu dula, nu lecati enu la lu'cu dula ante Diose. <sup>24</sup> Pero lunú chiqui' nze'ca Diose, enze'e uri'ilanu perdona ye stula'ahua, sin nú dixiu'ahua lunu, sino que Jesucristo udixi-ula equie cuenda' stula'ahua chenu ungutinu lu cruse. <sup>25</sup> Diose uxe'la Jesucristo lu iliulabe para nú equie cuenda' rene'nu nú uti'chianu ri'inu perdona bee bene iliulabe, nu neca nucua' para bee bene enu chili arqui' Jesucristo, scua rlube' nú ye nú rri'i Diose neli necane. Nu tunu hasta hua'tu lá ri'inu elu usticia equie bee dula nú rlu'cu bee bene, necane lunú rlu'cu arqui'nu bee bene. <sup>26</sup> Para nú nee nu' modo lube'nu lubee bene nú ñia necanu nu para nú rri'i bee bene beya' nú li'inu rri'inu tucu nú necane enze'e rri'inu perdona stula bee bene enu nzeli arqui' Jesucristo.

<sup>27</sup> Nee ¿xi equie zucu' aya'ahua lia'ahua? Leca xine, xne la necane equie cuenda' nú sucua'ahua nú rni ley nú ri'i Diose perdona lia'ahua sino que necane nú nzeli arquia'ahua Jesucristo. <sup>28</sup> Enze'e nediya' nze'ca'ahua nú rri'i Diose perdona stula bee bene equie nú nzeli arqui' bee bene Jesucristo nu lanecane equie cuenda' nú zucu' bee bene nú rni ley.

<sup>29</sup> ¿Xie' Diose necanu Diose lubee bene Israel tsia? ¿Nu lacanu Diose lubee bene enu laca bee bene Israel chela? Pero li'á nia luhua nú li'inu necanu Diose luye bee bene iliulabe. <sup>30</sup> Xne nu'

tucutsia Diose, nu li'inu rri'inu perdona bee bene enu nzeli arqui' Jesucristo, sianu rlu'culla seña nú rnibiy'a' ley nú rquie bee bene Israel, urre la lu'culla seña cua'. <sup>31</sup> La ri'ihua elliebacu' nú rluachu'ahua ley equie nú nzeli arquia'ahua Jesucristo sino que equie nú nzeli arquia'ahua li'inu sucua'ahua nú rni ley.

## 4

### *Xneca uchili arqui' Abraham Diose*

<sup>1</sup> Li'ihua nediya'hua nú xneca unga lu cuenda' Abraham bene'ahua enu udetela, li'illa enu rlutila uquie seña nú rquie bee bene Israel. <sup>2</sup> Tunu aca nebacu' Abraham nú la lu'culla dula equie beenú uri'illa, che nu' modo nú azucu' ayalla li'illa lubee bene, pero lu Diose leca modo ari'illa scua. <sup>3</sup> Pero Stichia' Diose rni: "Xne uyali arqui' Abraham Diose, enze'e ubacu' Diose li'illa xi neca tucu enu la lu'cu dula." <sup>4</sup> Chenu rri'i tucu bene riñ'a', dimi nú riaxulla la necane nú lia rati'llae sino que rri'illa anae equie riñ'a' nú uri'illa. <sup>5</sup> Pero para nú ri'i Diose perdona stula bee bene, leca modo nu ni bene nu aca perdonalla equie beenú uri'illa, sino que equie nú uchili arqui' bene Jesucristo enze'e ubacu' Diose li'illa nú la lu'cua'lla dula. <sup>6</sup> Le'ca uni David lu cuenda' bee bene enu uri'i Diose nú la lu'cu'a dula, nu la necane equie beenú xi uri'illa, <sup>7</sup> nu unilla:

Ñia neca lu cuenda' bee bene enu uri'il'a Diose perdona stula, nu uchilalanu stula.

<sup>8</sup> Ñia neca lu cuenda' bee bene enu nebacu'l'a Diose, nú la lu'cua' dula.

**9** Lá ni David nucua' para bee bene Israel enu nequie seña, sino que unilla bee bedichia' quie' lu yebee bene. Tucu nú uni'la'ahua nú Diose ubacu'la Abraham nú la lu'culla dula xne uchili arqui'lla li'inu. **10** Nu chenu ubacu' Diose li'illa la lu'culla seña nú rquie bee bene Israel, ante nú quie señacula' Abraham nebacu'la Diose li'illa nú la lu'culla dula. **11** Nu chenu ubacu' Diose Abraham nú la lu'culla dula, che luze'elá uquie señacula' li'illa, xne señacula' neca nú nebacu'la Diose li'illa nú la lu'culla dula equie nú uchili arqui'lla li'inu. Scua neca Abraham pa' ye bee bene enu nzeli arqui' Diose, mase nú la nequie seña nú rquie bee bene Israel li'illa, pero lunú nzeli arqui'beella Diose nebacu'lalu li'ibeella, nú la lu'cu beella dula. **12** Nu le'ca neca Abraham pa' bee bene enu nequie seña nú rquie bee bene Israel, nu nzeli arqui'beella Diose tucu nú uyali arqui' Abraham, ante nú quie seña li'illa.

*Rialu nú ucuaqui u'na Diose equie nú nzeli arqui' bee bene li'inu*

**13** Chenu ucuaqui u'na Diose lu Abraham cuna lubee bene enu nzeli arqui' Diose, tucu nú uyali arqui' Abraham nú dete'nu nú yucu beella ililabe xi neca tucu erencia. Lá cu aqui u'na Diose nucua' lu Abraham, equie nú uzucu'lla nú rni ley, sino que necane lunú uchili arqui'lla Diose. **14** Xne tunu bee enu sucu'tsia ley ati' erencia cua', lecaxi sibi' nú nzeli arqui' bee bene Diose, le'ca la zibi' nú ucuaqui u'na Diose lu Abraham che. **15** Pero lacane scua, xne ley neca para nú dete' castiya bee bene pero elu leca ley leca modo nú ni bee bene nú la zucu' bene nú rni ley.

**16** Enze'e chenu ucuaqui u'na Diose lu Abraham nú dete'nu nú ucuaqui u'nanu lu ye bee bene enu nzeli arqui' li'inu, tucu nú udete'nue lu Abraham scua ucuaqui u'nanu lu Abraham xne uchili arqui'lla li'inu, nu la necane nú ucuaqui u'na Diose nucua' para bee bene enu sucu'tsia ley sino que necane para bee bene enu nzeli arqui' Diose, tucu nú uyali arqui' Abraham Diose, mase nu la chulu beella ley, nu scua Abraham neca pa' ye'ahua.

**17** Tucu nú rni lu ichi' Stichia' Diose lu cuenda' Abraham, elu rni: "Li'ilu acalu pa' huaxi bee bene iliulabe." Nucua' neca nú ucuaqui u'na Diose lu Abraham, nu uchili arqui'lla nú uni Diose lulla, li'inu enu rri'i nú rehuañi bee benenguti nu rrinu equie cuenda' beenú lecasca' lu iliulabe quie' xi neca nú nu'lane.

**18** Añinzuca nú nediya' Abraham nú leca modo nú lu'culla endu', pero chenu uni Diose lulla nú lu'culla endu' che ita uyali arqui'lla nú uni Diose lulla scua, neca Abraham "pa' ye bee bene", enu nzeli arqui' Diose, tucu nú uni Diose lu Abraham: "Scua aca huaxi bee lli'ñilu." **19** Nu uyali arqui' Abraham nú uni Diose lulla nú lu'culla endu', nu nzalalla casi tucu ayu'u lana, nu unguuxulalla nu le'ca esquie una'lla Sara, pero lá tsuchiicu arqui'lla lunú uni Diose lulla. **20** Nu lá za' arqui'lla núa yalu tucu nú ucuaqui u'na Diose lulla sino que diquinu' arqui'lla uyali arqui'lla nú uni Diose lulla, nu udete'lla che'tsa lunu. **21** Chiqui' nzuta' arqui' Abraham nú chiqui' reca Diose ri'i tucu nú ucuaqui u'nanu lulla. **22** Enze'e nebacu'la Diose Abraham nú necalla tucu bene enu la lu'cu dula xne uchili arqui'lla li'inu.

**23** Nu elu rni nú Diose nebacu'la Abraham nú necalla tucu bene enu la lu'cu dula, lunú uyalí arqui'lla li'inu, láminu lu cuenda'tsia Abraham, **24** sino que le'ca uninu nucua' lu cuenda'ahua, xne nzelila arquia'ahua Diose, che nebacu'lanu lia'ahua nú la lu'cua'ahua dula, li'inu enu uri'i nú uhuañi zeca Jesucristo lu eluti. **25** Jesucristo enu unguti equie stula'ahua nu uhuañi zecanu lu eluti nu equie cuenda' li'inu la lu'cua'ahua dula lu Diose.

## 5

### *Xa seca bene chenu la lu'cua' bene dula lu Diose*

**1** Nu equie nú nzeli arquia'ahua Diose la lu'cua'ahua dula lunu, nu equie cuenda' Jesucristo ñia nzu arqui' Diose lua'ahua. **2** Xne lunú nzeli arquia'ahua Jesucristo nu' modo xneca riña'ahua lu Diose, nu nzuta' arquia'ahua lunú nzeli arquia'ahua nu ñia nzu arquia'ahua, nu riña'ahua lu ellie'e elu nzucu Diose liñibe. **3** Nu la necane equie cuenda'tsia nucua' nú ñia nzu arquia'ahua sino que le'ca equie nú nehuana se'ca'ahua, xne nediy'a'ahua nú chenu nehuana se'ca'ahua másela rlu'cua'ahua paciencia. **4** Nu lunú rlu'cua'ahua paciencia aca'ahua rriquia'ahua lunú xi ze'ca'ahua, nu equie nú rriquia'ahua nzucu lua'ahua nú riña'ahua lu Diose. **5** Nu lunú nzucu lua'ahua nú riña'ahua lu Diose neli aca nucua', xne nediy'a'ahua nú seca Diose lia'ahua xne nzu Espíritu Santo nú uliqui'nu cuna lia'ahua.

**6** Ante nehuañia'ahua sin nú ria'ahua beya' xneca tsila'a Diose lia'ahua lu stula'ahua, pero chenu uriña bichia nú ube'ta Jesucristo unguti

equie cuenda'ahua nú neca'ahua bene enu rlu'cu dula. <sup>7</sup> Nediya'ahua nú neríña' nú ti zela ati equie cuenda'stucu bene, pero ni' lu cuenda'tucu bene enu rri'i nze'ca urre nu' ti zela ati equie cuenda' stucu bene nze'ca. <sup>8</sup> Pero ulube' Diose nú chiqui' secanu lia'ahua enze'e unguti Jesucristo equie cuenda'ahua chenu uria'ahua puro dula. <sup>9</sup> Nu nee nú la lu'cua'ahua dula equie cuenda'rene nú uti'chia Jesucristo lu cruse chenu ungutinu, neli nú la zeca'ahua castiya' Diose equie cuenda'nu. <sup>10</sup> Xne chenu rri'sca'ahua lunú la yu' arqui' Diose che uxe'lanu lli'ñi e'cunu lu iliulabe unguti lu cruse equie cuenda'ahua nu scua uyala arqui'nu lua'ahua enzaláquie' nee nú uyala arqui' Diose lua'ahua. <sup>11</sup> Nu nee nú nzu Jesucristo cuna lia'ahua, enze'e chiqui' ñia nzu arquia'ahua dete'ahua che'tsa lu Diose equie cuenda' Jesucristo enu rnibiya' lua'ahua, xne equie cuenda' li'inu uyala arqui' Diose lua'ahua.

### *Adán nu Jesucristo*

<sup>12</sup> Scua necane xne equie cuenda' tucu bene uyu'u dula lu iliulabe, nu equie cuenda' dula uyu'u eluti, nú rati ye bee bene xne ye bee bene uri'i dula. <sup>13</sup> Chenu lecasca' ley nú udete' Diose lu Moisés añinu'ca dula lu iliulabe, pero lunú leca ley hua'tu enze'e la ri'i caso bee bene nú rri'illa dula. Che leca modo zeca bene castiya tucu nú rnibiya' ley. <sup>14</sup> Pero añica unguti beella hasta tiembu' Adán nu hasta tiembu' Moisés, añinzuka nú lá ri'i beella sa' dula nú uri'i Adán, nu tiembu ze'e unga Adán tucu seña equie cuenda' tucu bene enu nzu nú nze'ta.

**15** Nu laca iguale dula nú uri'i Adán, cuna nú chiqui' rri'i nze'ca Diose lubee bene, nu equie cuenda' dula nú uri'i tucu bene ye bee bene rati, pero le'ca equie cuenda' tucu bene huaxi bee bene tsila'a Diose, nu li'inu necanu Jesucristo, nu equie cuenda'nu lia tsila'a Diose lia'ahua. Nu lunú uri'i Jesucristo másela seca para huaxi bee bene. **16** Laca iguale dula nú uri'i Adán cuna lunú chiqui' rri'i nze'ca Diose. equie cuenda' tucutsia dula, uyu'u castiya para bee bene pero equie cuenda' Jesucristo nu' modo tsila'a bee bene mase nú uri'illa huaxi dula. **17** Equie cuenda' dula nú uri'i Adán, uyu'u eluti nú rati ye bee bene, pero uri'i Diose ana lunú uri'i Adán equie nú uri'i Jesucristo nú sila'a ye bee bene enu seca nú equie cuenda' Jesucristo la lu'cua'lla dula ante Diose nu lu'culla nú huañililla lu Diose.

**18** Nu scua tucu nú uyu'u eluti xi neca castiya para ye bee bene equie dula nú uri'i Adán, le'ca esquie lunú uri'i nze'ca Jesucristo tsila'a bee bene nu huañilí bee bene liñibe lu Diose. **19** Xne lunú né zucu' tucu bene nú uni Diose ye bee bene rlu'cu dula, pero le'ca scua lu cuenda' tucu bene enu uzucu' nú uni Diose nebacu' Diose bee bene nú la lu'cu bene dula ante lunu.

**20** Udetel' Diose ley'nu lu Moisés para nú lu cuenda' ley cua' ri'i bee bene beya' nú rri'i bee dula, nu elu chiqui' uri'i bee bene dula másela uri'i nze'ca Diose nu uri'inu perdona bee bene ze'e. **21** Hua'tu unibiyá' dula lubee bene nu equie cuenda' dula cua' rati bee bene, pero nee lunú chiqui' seca Diose lia'ahua equie nú chiqui' nze'canu nebacu'nu lia'ahua nú la lu'cua'ahua

dula, nu liqui'nu nú huañilia'ahua liñibe lu Diose equie cuenda' Jesucristo.

## 6

### *Neca xi neca nú unguti'la'ahua lu dula*

<sup>1</sup> La ri'ihua elliebacu' nú nia nú ri'ilá'ahua dula para nú ri'i nze'calá Diose lua'ahua. <sup>2</sup> Lacane scua, xne neca xi neca nú unguti'la'ahua lu dula, nu leca modo nú ri'ilá'ahua dula. <sup>3</sup> Xne chenu uri'nza'ahua equie cuenda' Jesucristo, neca xi neca nú ungutila'ahua cuna li'inu. <sup>4</sup> Chenu urinza'ahua neca nucua' xi neca nú uhuachi'la'ahua cuna Jesucristo nu ungutila'ahua cuna li'inu para nú scua tucu nú uhuañinu lu eluti, cuna poder' Diose le'ca nu' modo lu'cua'ahua elunehuañi nú necuqui neca nú huaña'ahua tucu nú niarqui' Diose nú huaña'ahua.

<sup>5</sup> Nu tunu neca tucunecatse'ahua cuna Jesucristo lu eluti'nu, le'ca scua tucu nú uhuañi zecanu lu'cua'ahua stucu elunehuañi nú necuqui neca. <sup>6</sup> Chenu unguti Jesucristo lu cruse, ungutinu equie ye nú neca'ahua hua'tu chenu lasca' chulua'ahua li'inu, nu hasta lu'tsia ulaxu nú neca'ahua hua'tu xne leca' modo nibiya'lá dula lua'ahua. <sup>7</sup> Xne bene enu ungutila lu cuenda' dula la nibiya' dula lu nze'e. <sup>8</sup> Nu equie nú unguti Jesucristo equie cuenda' stula'ahua, unguti'la'ahua lu dula, nú le'ca nediy'a'ahua nú huaña'ahua cuna li'inu. <sup>9</sup> Xne nediy'a'ahua nú chenu uhuañi zeca Jesucristo lu eluti, leca' xunga atinu nu la nibiya' eluti lunu. <sup>10</sup> Jesucristo ungutinu tucutsia bese equie cuenda' stula bee bene nu nee nehuañinu para nú zucu' ayanu Diose. <sup>11</sup> Le'ca scua utsu

arqui'hua nú ungutilahua lu dula nu nehuañihua para nú zibi'hua lu Diose, equie nú neca tucu necatselahua cuna Jesucristo.

<sup>12</sup> Enze'e diqui nú nehuañihua lu iliulabe quie' la zelahua nú nibiya' dula luhua, nu la zelahua nú ri'i elliebacu' nú necha neca ana luhua para nú ri'ihua nú necha neca. <sup>13</sup> La dete' cuendahua li'ihua lu dula para nú ri'ihua nú necha neca, mejora uzu'cu'hua nú rni Diose xi neca tucu bene enu unguti nu uhuañi zeca para li'inu, nu uzelahua nú nibiya'nu luhua para nú ri'ihua nú neca nze'ca. <sup>14</sup> Nu nee la nibiya' dula luhua xne la nibiya' ley luhua sino que nehuañihua lu eluseca' Diose.

<sup>15</sup> La nia luhua lunú nzenala'ahua eluseca' Diose nu nu' modo ri'ilá'ahua dula, xne la nibiya' ley lua'ahua xne lacane scua. <sup>16</sup> Li'ihua nediyaa'huá nú tunu nu' tucu enu rnibya' lua'ahua che rqui'ña nú zucua'ahua stichia' nze'e. Nu tunu rnibya' dula luhua che yalahua castiya. Pero tunu sucu'hua Stichia' Diose che huañi nze'cahuá. <sup>17</sup> Pero che'tsalá Diose nú mase unibya' dula luhua hua'tu, pero nee diquinu' arqui'hua nzenalahua Stichia' Diose. tucu nú ungalahua. <sup>18</sup> Nu nee nú la nibiya' dula luhua nehuañilahua para nú ri'ihua tucu nú niarqui' Diose. <sup>19</sup> Rnia luhua puro bee bedichia' nú rri'ihua beya' nú xi rni, xne nediyaa nú neríñá' ri'ihua beya' bee nucua' tucu nú unibya' dula luhua hua'tu chenu uri'ihua beenú la zibi' cuna beenú necha neca, nee uzelahua nú nibiya'li Diose luhua para nú ri'ihua nú neca nze'ca, nu uhuañihua tucu nú niarqui'nu nu huañihua.

**20** Chenu unibiya' dula luhua lá chenu arqui'hua nú ahuañi nze'cahuá. **21** Pero, ¿xi uri'ihua ana equie beenú necha neca uri'ihua tiembu ze'e, nu neequie rtu'hua equie cuenda' beenú necha neca cua' uri'ihua? Xne nediyá'hua nú equie cuenda' nucua' nze'ta castiya' Diose. **22** Pero nee nú la nibiya' dula luhua nu sucu'hua nú rni Diose, nucua' ñia neca xne scua nu' modo huañihua tucu nú niarqui' Diose nú huañihua nu añica lu'cuhua elunehuañi nú leca xunga laxu lunu. **23** Xne lunú rri'i bene ana nú rri'i bene dula neca castiya pero nú lia rliqui' Diose neca elunehuañi nú leca xunga laxu equie cuenda' Jesucristo enu rnibiya' lua'ahua.

## 7

### *Ejemplu' bee bene enu nechia*

**1** Bee sa'a enu nzeli arquia'ahua Jesucristo li'ihua nediyá'hua nú xneca neca ley, nú ley rnibiya' lubee bene diqui nú nehuañi bene. **2** Necane xi neca tucu una'a enu nechia nú leca' modo chianchu stucu niyu rene diqui nú nehuañi niyu'nchu, pero tunu ati niyu'nchu leca ley nú cá nú chianchu stucu bese. **3** Pero tunu nehuañisca' niyu'nchu nu yucunchu stucu niyu, nehuañinchu lu eluhuexe che. Pero tunu unguti niyu'nchu leca' ley nucá nú chianchu stucu niyu, nu la ri'inchu eluhuexe che.

**4** Le'ca scua bee sa'a enu nzeli arquia'ahua Jesucristo, equie nú unguti Jesucristo, ulaxu nú rnibiya'ley' Moisés luhua. Neequie necalahua bee bene' Jesucristo. Li'linu enu uhuañi zeca lu eluti, nu scua nu' modo nú ria'ahua tucu nú niarqui'

Diose nú ria'ahua. <sup>5</sup> Xne chenu uhuañia'ahua tucu nú uniarqui'tsia'ahua a'lá máse uri'i ley nú uya'la elliebacu'ahua para nú ria'ahua lunú la nibiya' ley nú ria'ahua nu scua uria'ahua nú necha neca nú riala aze'ca'ahua castiya. <sup>6</sup> Pero nee neca xi neca nú ungutila'ahua lu cuenda' ley, nee nú la nibiya' ley lua'ahua nu lunú uche'ela modo nú nehuañia'ahua, nee nu' modo nú ria'ahua lunú niarqui' Diose nú ria'ahua equie cuenda' Espíritu Santo nú nzu cuna lia'ahua. Nu la necane equie nú nzenala'ahua nú rnibya' ley.

<sup>7</sup> La nia luhua nú la neca nze'ca ley, xne lacane esquie. Xne tunu leca ley lá aria'a beya' nú xi neca dula, nu leca xunga aria'a beya' nú dula neca chenu rle'lu stene' sa'lú, tunu leca nú rni ley: "La le'lu stene' sa'lú." <sup>8</sup> Pero chenu uri'á beya' nú la neca nze'ca nú rle' bene stene' sa'lla che máse udala dula nú rri'á equie cuenda' ye nú rlea lu'cua nú rlu'cu stucu bene. Tunu leca ley lá ari'i bee bene beya' xi neca dula. <sup>9</sup> Ante nú chulua ley ulle'caa nú nehuañi nze'caa. Pero chenu uyulua ley uri'á beya' nú rri'á dula nu equie cuenda' dula cua' necaa xi neca tucu bene enu unguti. <sup>10</sup> Sibi' ley para nú ri'i bee bene beya' xneca riala nú huañilla. Pero para li'á sibi'tsia ley para nú atia. <sup>11</sup> Xne hua'tu uzequienu dula li'á nú nu' modo ri'á ye nú rnibya' ley pero le'ca lu cuenda' ley cua' uri'á beya' nú riala zecaa castiya.

<sup>12</sup> Pero la necane nú necha neca ley xne Diose udu' ley, nu ye nú rni ley le'ca Diose udu'e, nu neca nze'cae, nu neli rnii. <sup>13</sup> La lu'cu ley culpa nú atia, sino que dula neca nú uzequienu li'á para nú atia nu equie cuenda' ley cua' uri'á beya' nú necha

neca nú rri'i bene dula.

<sup>14</sup> Nediya'ahua nú equie cuenda' Espíritu Santo nze'ta ley nú rni equie cuenda'nu. Pero lunú necaa bene, enze'e siempre rri'i dula ana lua. <sup>15</sup> La ri'á beya' xi se'ca xne lunú niarquia ri'á la ri'á, sino que lunú laniarquia ri'á enze'e neca nú rri'iá.

<sup>16</sup> Nu chenu rri'á lunú la niarquia ri'á, scua rri'á beya' nú neca nze'ca ley, xne lu cuenda' ley rri'á beya' xi rri'á. <sup>17</sup> Nu la ri'i riña'a lunú la yala ri'á, sino que rri'ine equie cuenda' dula nú nu' arquia.

<sup>18</sup> Xne lunú necaa bene, nediyaa nú lacaa bene nze'ca, mase nú niarquia ri'á nú neca nze'ca, pero la ri'á ana nú ri'á scua. <sup>19</sup> La ri'á ana ri'á nú neca nze'ca niarquia ri'á, sino que a'lá lunú necha neca nú la niarquia ri'á enze'e rri'á. <sup>20</sup> Neequie tunu rri'á lunú la niarquia ri'á, la neca nú rri'i riña'ne, sino que necane equie cuenda' dula nú nu' arquia enze'e rri'á scua.

<sup>21</sup> Pero nee rri'á beya' nú máse niarquia ri'á nú neca nze'ca, pero chu rri'i dula nú nu' arquia ana lua. <sup>22</sup> Chiqui' riu' arquia zucua nú rnibiya' Diose.

<sup>23</sup> Pero nu' tucu nú rcaa nú ri'á scua, nu nucua' neca dula, xne nu'sca' dula arquia.

<sup>24</sup> ¡Cue'curua! ¿Ti tsila'a li'á lu castiya nú zecaa equie dula nú rri'á nú necaa bene? <sup>25</sup> ¡Pero che'tsalá Diose nú equie cuenda' Jesucristo ut-sila'anu li'á lu castiyacua'! Xne mase rri'á el-liebacu' nú ri'á puro nú rnibiya' Diose, pero lunú necaa bene, rri'i dula ana lua.

## 8

*Elunehuañi nú rlu'cu bene cuna Espíritu Santo*

<sup>1</sup> Enze'e ye bee bene enu nzeli arqui' Jesucristo la zeca' bee bene ze'e castiya' Diose. Bee bene enu la nehuañia' lunú necha neca sino que rla'nalla nú huañilla tucu nú niarqui' Espíritu Santo nú huañilla. <sup>2</sup> Xne lunú rnibiya' Espíritu Santo nú nzu cuna lia'ahua lunú neca tucu necatse'la'ahua cuna Jesucristo la nibiya' dula lua'ahua, nu le'ca la yala'ahua castiya' Diose. <sup>3</sup> Lunú neca'ahua bene lá aca ley ari'i elietsa lua'ahua, ley nú udete' Diose lu Moisés. Pero nee uri'i Diose lunú né aca ley cua' ari'i. Li'inu uxe'lanu Lli'ñinu lu iliulabe quie' xi neca tucu bene para nú ungutinu equie stula'ahua, nu scua udixiunu equie cuenda' stula'ahua para nú leca' xunga nibiya' dula lua'ahua. <sup>4</sup> Nee nehuañi'la'ahua lu Diose xi neca tucu bene enu sucu' ley, xne la nehuañia'ahua tucu nú niarqui'tsia'ahua sino que nehuañia'ahua tucu nú rnibiya' Espíritu Santo.

<sup>5</sup> Bee bene enu nehuañitsia lunú neca elliebacu', rri'itsialla elliebacu' nú ri'illa lunú niarqui'tsialla. Pero bee bene enu nehuañi tucu nú rnibiya' Espíritu Santo, máse nzucululla nú ri'illa lunú rnibiya' Espíritu Santo nú ri'illa. <sup>6</sup> Nu lunú nzuculu bene nú rri'itsialla lunú necha neca, che nze'ta castiya nú zecalla, pero chenu nzucutsialu bene nú rri'illa tucunú rnibiya' Espíritu Santo che rlu'cu bene elunehuañi lu Diose nu la chenu arqui'lla. <sup>7</sup> Bee bene enu nzuculutsia nú huañi tucu nú niarqui'tsia, li'ibeei necabeei enu la zucu' nú rni Diose equie nú la niarqui'beei nibiya' Diose lubeei nu le'ca la acabeei ri'ibeei tucu nú niarqui'nu. <sup>8</sup> Enze'e bee bene enu nehuañi tucu nú niarqui'tsia, la yu' arqui' Diose xa rri'ibee nze'e.

<sup>9</sup> Pero li'ihua la nehuañihua lunú necatsia el-liebacu'hua, sino que li'ihua nehuañihua tucu nú rnibiya' Espíritu Santo, tunu neli nú nehuañihua cuna Espíritu Santo' Diose, xne bene enu la nzu Espíritu Santo cuna li'i laca nze'e bene' Jesucristo. <sup>10</sup> Pero tunu nehuañilahua cuna Jesucristo, lecaxi ri'i mase nú unitilu dula li'ihua. Nu nee nehuañilahua cuna Espíritu Santo nu nebacu'la Diose li'ihua nú la lu'cuhua dula. <sup>11</sup> Nu tunu nehuañilahua cuna Espíritu Santo' Diose, li'inu enu uri'i nú uhuañi zeca Jesucristo lu eluti, che mase nú atihua, pero le'ca ri'i Diose nú huañi zeca cuerpo'hua lu eluti para nú lu'cuhua elunehuañi equie cuenda' Espíritu Santo nú nehuañi cuna li'ihua.

<sup>12</sup> Enze'e bee sa'a enu nzeli arquia'ahua Jesucristo, la yala nú huañia'ahua tucu nú niarqui'tsia'ahua. <sup>13</sup> Xne tunu li'ihua nehuañihua lunú niarqui'tsiahua, che rialahua castiya'hua, pero tunu equie cuenda' Espíritu Santo nú nzu cuna li'ihua utsana' arqui'ahua stulahua che lu'cuhua elunehuañi nú la laxua'lu Diose.

<sup>14</sup> Xne yebee bene enu sela nú rnibiya' Espíritu Santo' Diose lu, li'ibeella neca beella lli'ñi Diose. <sup>15</sup> Xne lá yucuhua Espíritu Santo para nú lliquihua, xi xiqui tucu bene patron'lla sino que equie cuenda' Espíritu Santo necalahua lli'ñi Diose nu equie cuenda' Espíritu cua' rnia'ahua lu Diose: “¡Pa'ahua!” <sup>16</sup> Nu le'ca equie cuenda' Espíritu Santo quie' nediyahua nú si'ahua nú neca'la'ahua lli'ñi Diose. <sup>17</sup> Nu lunú neca'ahua lli'ñi Diose riala'ahua herencia nú liqui' Diose tucu nú riala Jesucristo, tunu neli nú riquia'ahua

nú nehuana ze'ca'ahua tucu nú ulle'canu che nu'  
modo riña'ahua liñibe elu nzucunu.

*Eluxene nú atia'ahua liñibe*

<sup>18</sup> Nediya nze'caa nú liaxi nú nehuana se'ca'ahua nee, luquela nú seca eluxene nú atia'ahua liñibe. <sup>19</sup> Nu hasta yebeenú ureche' Diose, chiqui' nzuquiene nú ala' uriñala bichia nú acachee nú tineca bee lli'ñi Diose. <sup>20</sup> Xne iliulabe uchiñii lubeenú necha neca, pero lecaxi culpa'e, sino que Diose uzela nú ungae scua. Nu nee nzuquietsia iliulabe, <sup>21</sup> nú la'ane lu beenú necha neca nu'lue, nu naa zecae tucu nú ñia nae chenu apenatsia uquixiee, tucu nú le'ca la'a bee bene' Diose lubee nú necha neca nu' lu iliulabequie'. <sup>22</sup> Nu diquila nú nzuquie iliulabe nú riña bichia ze'e, lia'ahua nediy'a'ahua nú chiqui' nehuana seca iliulabe xi seca tucu una'a enu ala endu'. <sup>23</sup> Nu la necane nú iliulabetsia seca scua sino que le'ca nua'ahua enu nchiñi Espíritu Santo arqui' xi neca tucu seña lunú liqui' Diose lua'ahua. Nu chiqui' nehuana se'ca'ahua diquila nú nelluaquie'ahua nú riña bichia nú acachee nú neca'ahua lli'ñi Diose, bichia chenu che'enu cuerpo'ahua nu liqui'nu stucu nú necuqui. <sup>24</sup> Nediya'ahua nú scua acane nu nucua' nzuculua'ahua nú aca equie nú nzeli arquia'ahua nú utsila'ala'ahua, li'ihua nediy'a'ahua nú tunu lunú nelluaquie'ahua nú aca ungalane, leca xiquie nú lluaquie'la'ahuane. <sup>25</sup> Pero tunu nelluaquie'ahua nú aca lunú lasca' aca, che layala nú llaca'ahua lluaquie'ahua nú acane.

<sup>26</sup> Nu le'ca Espíritu Santo ri'i elietsa lua'ahua chenu la ria'ahua beya' xneca ria'ahua, xne

nu' chenu laca'ahua nacua'ahua lu Diose tucu nú rialane. Nu chenu la ria'ahua beya' xneca nia'ahua lu Diose lunú niarquia'ahua nia'ahua, pero Espíritu Santo nediy'a' xa rria'ahua elliebacu', che li'inu see arqui'nu rnacu'nu lu Diose lu cuenda'ahua. <sup>27</sup> Nu Diose, li'inu enu nu'l'u arqui' bee bene, nediy'a'nu xi rnacu' Espíritu Santo lunu lu cuenda'ahua. Xne chenu rnacu' Espíritu Santo equie cuenda' bee bene' Diose, li'inu rnacu'nu lu cuenda' bee bene tucu nú niarqui' Diose.

### *Añica nú ria'ahua ana*

<sup>28</sup> Lia'ahua nediy'a'ahua nú ye nú se'ca'ahua lu iliulabequie, zibi'i lua'ahua, lia'ahua enu se'ca'ahua Diose lia'ahua enu uri'i caso stichia'nu para nú ria'ahua tucu nú niarqui'nu. <sup>29</sup> Nu hasta hua'tu nediy'a'la' Diose ti bee enu chili arqui' li'inu, nu ucañinu li'ibeella para nú huañi beella, nu acabeella xi neca lli'ñinu Jesucristo, para nú Jesucristo aca enu nibiya' lu ye bee bene enu neca lli'ñi Diose. <sup>30</sup> Xne ye bee bene enu nediy'a' Diose nú chili arqui' li'inu, ucañinu li'ibeella nu ubixianu beella para nú aca beella bee bene'nu, nu ulu'cu cuendanu beella nú la lu'cubeella dula, nu uninu nú dete'nu eluxene lubeella liñibe.

<sup>31</sup> Nee nú nediy'a'la'ahua yebee nucua' lecaxi ri'i mase nú rri'i cundra bee bene lia'ahua, Diose ri'i elietsa lua'ahua. <sup>32</sup> Necaa Diose lli'ñinu unguti equie cuenda' stula'ahua. Nu tunu uliqui'nu lli'ñinu unguti equie stula'ahua. ¿Xaque nú la liqui'nu ye beenú liqui'nu lua'ahua equie cuenda' lli'ñinu? <sup>33</sup> ¿Ti aca xanabitsi lu cuenda'ahua nú neca'ahua bene enu rlu'cu dula ante Diose? Xne le'ca li'inu ubacu'nu lia'ahua nú la lu'cua'ahua

dula. <sup>34</sup> Lecati aca ni nú riala'ahua castiya, xne Jesucristo neca enu unguti para nú udixiunu equie cuenda' stula'ahua, nu la neca nucua'tsia sino que le'ca uhuañi zecanu lu eluti, nu nee nzucunu cue'tse Diose chube rnacu'nu lu Diose lu cuenda'ahua. <sup>35</sup> Nu tucu nú seca Jesucristo lia'ahua lecati ri'i ana huachuu lia'ahua lunu. Pero ni' nú nehuana nzu arquia'ahua, urre nú nehuana se'ca'ahua, urre lunú xi rri'inuu bee bene lia'ahua, urre nú rlia'na'ahua, urre nú leca xucua'ahua, urre nú xiquia'ahua, urre lu eluti, lecaxi nú huachuu lia'ahua lunu. <sup>36</sup> Lu ichi' Stichia' Diose rni:

Equie nú necaru bee lli'ñilu, ye ye'e nzuquie eluti li'iru,  
rri'inu bee bene li'iru xi rri'inu bee sanchi  
enu nzula nú ati.

<sup>37</sup> Pero ni' tucu bee nucua' la ri'i ana lua'ahua xne rri'i Jesucristo elietsa lua'ahua, li'inu enu seca lia'ahua. <sup>38</sup> Nediya nze'caa nu ni' eluti, nu ni' elunehuañi, nu ni' bee ángele, nu ni' bee benechiqui', nu ni' beelá bee enu rlu'cu nú rnibuya', nu ni' lunú reca, urre lunú aca, <sup>39</sup> urre lunú nze'ta enza liñibe, urre liñi yuu, ni' tucue nu ni' stucu lunú ureche' Diose, lecaxi nu lecati aca huachuu lia'ahua lu eluseca' Diose equie cuenda' Jesucristo.

## 9

<sup>1</sup> Como bene' Jesucristo nú necaa, rnia nú neli neca luhua la nia eluquichia' luhua. Nu li'á nediyaa nú Espíritu Santo nediyaa' nú neli neca nú rniá luhua, <sup>2</sup> nu ye ye'e chiqui' nehuana nzu arquia hasta nú rcuu arquia. <sup>3</sup> Nu hasta niarquia

nú mase nú yalalá castiya' Diose mase nú huachu Jesucristo li'á tucu chu, pero ala' nú tunu scua nu' modo ri'i nucua' elietsa lubee bene lachia Israel para nú la zeca beeí castiya. <sup>4</sup> Nucua' si'á lubee bene lachia Israel, nu li'ibeeí neca enu ucañí Diose nú aca bee bene'nu, nu rulu siqui'nu ube'tanu lubeella, nu uninu lubeella nú xneca modo lu'cubeella tucu inziu nú riña beella lunu, nu udete'nu leynu yabeella, nu uninu lubeella nú xneca lu'cubeella ula'na lunu, nu uninu nú xi dete'nu lubeella. <sup>5</sup> Nu la necane lucuenda'tsia bee nucua', sino que le'ca lubee familia'ahua enu udetela enu uzibi' lu Diose nze'tabeella, nu le'ca lu familia cua' nze'ta Jesucristo chenu uriñanu lu ilulabe li'inu enu neca Diose enu riala nú lu'cu bee bene ula'na lu diqui tiembu, equie nú rlu'cunu elurnibiya' lu yebee nú nu'. Amén.

<sup>6</sup> La nia luhua nú la tsalua' Diose stichia'nu lubee bene Israel, sino que lunú rnia nú la yebee bene Israel neca bee bene' Diose. <sup>7</sup> La necane equie nú nze'tabeella lubee familia' Abraham nú yebeella neca beella bene' Abraham, xne uni Diose lu Abraham: "Hasta lu endu'lu Isaac quixie bee lli'ñilu." <sup>8</sup> Scua rría'ahua beya' nú la neca nú neca bene bene Israel, nú necala bene bene' Diose, sino que bee enu neca bene' Diose neca bee enu nebacu' nze'ta leta bee familia' Abraham xne nzeli arqui'beella Stichia' Diose xi uyalí arqui' Abraham. <sup>9</sup> Xne uyalí arqui'lla nú uni Diose lulla, chenu uninu lulla: "Steliana le'ca mismo tiembuquie' nzelaa nu che rlu'cula Sara tucu endu!"

<sup>10</sup> Nu lacane nucua'tsia sino que chenu uru'cu Isaac endu' Sara, che uchialla Rebeca. Nu ante nú ala bee cuachi enu ullana Rebeca. <sup>11</sup> Chenu

lasca' chulu beenu ni'nú neca nze'ca nú ni' nú necha neca, para nú acachee nú nediyal'a' Diose xa rcañinu bene, nu la necane lunú xa rri'i bene sino que li'inu nediyal'a'nu ti rcañinu, nu ante nú ala bee cuachi cua', <sup>12</sup> Diose uni lu Rebeca: "Lurucu bee cuachicua' enu ala nú rrucu, neca enu nibiya' lu enu rlutilá ala." <sup>13</sup> Tucu nú nequie lu ichi' Stichia' Diose elu rni: "Ulle'caa Jacob pero ulea lu Esaú."

<sup>14</sup> Nu nee, ¿xie' nu' modo nú nia'ahua nú la ri'i Diose tucu nú necane ché la? ¡Pero lacane esquie! <sup>15</sup> Xne uni Diose lu Moisés: "Se'caa bee bene enu niarquia nú ze'caa nu rua'a arquia bee bene enu niarquia nú hua'a arquia." <sup>16</sup> Enze'e leca modo nú hua'a arqui' Diose bee bene lunú niarqui'tsialla urre equie nú xi rri'illa sino que necatsia nucua' cuenda' Diose nú ti niarqui'nu hua'a arqui'nu. <sup>17</sup> Lu ichi' Stichia' Diose rni nú uni Diose lu arre Egipto: "Li'á url'á nú ungalu arre para nú lañi' bee bene lunú recaa nu lu cuenda' li'ilu ri'chialelse bee bedichia' nú ti necaa diqui lu iliulabe." <sup>18</sup> Enze'e nia luhua nú nediyal'a' Diose nú ti niarqui'nu hua'a arqui'nu, nu le'ca rri'i nzitinu enu niarqui'nu nú aca nziti.

<sup>19</sup> Pero tala besse nihua lua: "Tunu scua necane, ¿xinu rle Diose nú xneca neca'ahua nu leca modo nia'ahua lu Diose nú xi ri'inu?" <sup>20</sup> Pero, ¿ti necalu para nú niilu scua lu cuenda' Diose? Xie'nu' modo ni etsu lu bene enu ureche' etsu: "¿Xinu ureche'lu li'á scua?" <sup>21</sup> ¿Xie'lanu enu rreche' bee etsu, li'illa rri'inulla yuubi'chi xitse nú niarqui'lla la? Li'illa nediyal'a xi reche'lla cuna yuubi'chi ze'e, tunu reche'lla tucu etsu nú rqui'ña ye ye'e urre tucu etsu

nú rqui'ñiatsia lu eliñi.

<sup>22</sup> Neequie le'ca scua nediya'la' Diose ti riala castiya, nu hasta nú nu' beya' nú chu dete'nu castiya bee bene para nú scua acachee nú rlu'cunu poder pero li'inu ulu'cu arqui'nu nu uriqui'nu bee bene enu lá zucu' stichia'nu bee enu riala nú nitilu. <sup>23</sup> Nu uriqui'nu li'ibeei para nú acachee nú li'inu rlu'cu cuendanu nú xa ri'inu nu rlu'cunu nú rnibya'nu, nu uhua'a arqui'nu bee enu nediya'la'nu nú hasta hua'tu riala nú chu'u liñibe. <sup>24</sup> Nu lia'ahua neca bee benecua', bee enu ubixia Diose sia leta bee bene Israel nu sia leta bee bene enu laca bee bene Israel. <sup>25</sup> Tucu nú nequie lu ichi' Stichia' Diose nú uquie'e profeta Oseas, elu rni:

Bee enu laca benea, nia lubeei benea,  
nu bee bene enu lecati zeca, li'á zecaa beei.

<sup>26</sup> Elu uni Diose lubee bene: "Li'ihua lacahua bee benea", ze'e li'ibeei acabeei lli'ñi Diose enu nehuañi.

<sup>27</sup> Le'ca uni profeta Isaías equie cuenda' bee bene Israel: "Mase nú chiqui' huaxi bee bene Israel tucu nú huaxi eyuxi ru'u inzatu', pero laca huaxi bee bene enu tsila'a. <sup>28</sup> Xne lacaxea nú tsalu Diose stichia'nu lu iliulabequie' tucu nú unilanu."

<sup>29</sup> Nu hasta hua'tu le'ca uni profeta Isaías:  
Tunu Pa'ahua Diose enu rlu'cu ye nú rnibya'  
azela nú alaxu yebee bene'ahua enu ude-tela,

hasta hua'tula ulaxu bee bene'ahua che, tucu nú ulaxu bee bene Sodoma cuna Gomorra.

### *Bee bene Israel cuna Stichia' Diose*

<sup>30</sup> Neequie, ¿xania'ahua nee? Bee bene enu laca bee bene Israel ni' lá achenu arqui'beella

xa tsila'a beella pero nee utsila'ala beella lunú nzeli arqui'beella Jesucristo. <sup>31</sup> Nu bee bene Israel mase nú chiqui' ula'na beella modo nú xneca huañibeella tucu nú rnibya' ley para nú tsila'a beella pero né ri'ibeella ana. <sup>32</sup> ¿Xiquie nú né ri'ibeella ana nú tsila'a beella? Xne mase ula'na beella nú huañi beella tucu nú rnibya' ley, luhuare nú chili arqui'beella Diose tucu nú riala nú chili arqui'beella li'inu para nú tsila'a beella. Nu unga Jesucristo lubeella: "Xi neca tucu quiee nú xica cuchiu' bene." <sup>33</sup> Tucu nú nequie lu ichi' Stichia' Diose elu rni:

Li'á zucua tucu quiee eyeche Sión, quiee nú llica cuchiu' bene, nu zana' bene.

Nu enu chili arqui' li'inu leca' xunga tu' nze'e.

## 10

<sup>1</sup> Bee sa'a enu nzeli arquia'ahua Jesucristo, chiqui' rnacua lu Diose nú tsila'a bee bene Israel. <sup>2</sup> Xne li'á nediyaa nú chiqui' rla'na beella nú zibi' beella lu Diose. Pero la ri'ibeella beya' xneca ri'ibeella. <sup>3</sup> Xne la zela beella chili arqui'beella tucu nú rialane para nú ri'i Diose perdona beella sino que nzenalatsia beella tucu nú nzeli arqui'beella nú aca perdona beella, luhuare nú ri'i beella tucu nú niarqui' Diose para nú ri'i Diose perdona beella. <sup>4</sup> Xne equie cuenda' Jesucristo ulaxu nú rnibya' ley' Moisés lubee bene, nu nee bee bene enu chili arqui' Diose uri'ilanu perdona li'ibeella.

<sup>5</sup> Pero bee bene enu niarqui' nú huañi sin dula lu iliulabequie' equie nú nzenala beella ley' Moisés unii nú bene enu rri'i ye nú rnibya' ley lu'culla

elunehuañi mientra nú sucu'lla ley. <sup>6</sup> Pero lunú uri'i Diose perdoná bene necane lunú uchili arqui'lla Jesucristo nu la yala' ri'illa elliebacu': “¿Ti aca quiee liñibe?” Xne chenu rri'i bene elliebacu' scua niarqui' bene nú lañi'lla nú laca Jesucristo lu iliulabe. <sup>7</sup> “Le'ca la yala nilla: ¿Ti aca cha elu nu' bee benenguti?” Xne chenu rnilla scua niarqui'lla nú lañi'lla nú huañi zeca Jesucristo leta bee benenguti. <sup>8</sup> Pero lu ichi' Stichia' Diose rni: “Axu nzu Stichia' Diose lulu, rri'itsia nú niilu nu ri'ilu elliebacu' tunu chili arqui'lue.” Xne lunú rixiule'eru lubee bene necane nú xneca chili arqui' beella, nu singuie necane. <sup>9</sup> Tunu li'ilu nilu nú Jesucristo neca enu rnibiya' lulu nu diquinu' arqui'lu chili arqui'lu nú Diose uri'i nú uhuañinu lu eluti, che tsila'alu. <sup>10</sup> Xne desde hora nú diqui'nu arqui' bene nzeli arqui' bene Jesucristo che ut-sila'alla. Nu chenu ni bene nú Jesucristo neca enu rnibiya' lulla che tsila'alla. <sup>11</sup> Lu ichi' Stichia' Diose rni: “Ye bee bene enu chili arqui' Jesucristo leca xunga ya'na netúlla.” <sup>12</sup> Nu nucua' rni nú ante Diose iguale neca ye bee bene leca xirí'i nú ti benella, tunu necalla bene Israel urre lacalla bene Israel. Xne tucutsia Diose neca Diose lu ye bee bene, nu chiqui' ñia rri'inu luye bee bene enu rnacu' lunu. <sup>13</sup> Tucu nú nequie lu ichi' Stichia' Diose elu rni: “Yebee bene enu rnacu' lu Diose tsila'a bee nze'e.” <sup>14</sup> Pero, ¿xa nacu' bene lunu tunu lasca' chili arqui'beella li'inu? ¿Nu xa chili arqui' beella li'inu tunu lasca' yene' beella nú ti necanu? ¿Nu xneca yene' beella nú ti necanu nu lecati ixiule'e xa neca stichia'nú? <sup>15</sup> Nu, ¿xneca ixiule'e beella stichia'nú tunu lecati xe'la li'ibeella?

Lu ichi' Stichia' Diose rni: “¡Chiqui' ñia neca chenu rriña bene enu rriñayu resuna nze'ca para nú huañi nze'ca bee bene!”

<sup>16</sup> Pero la yebee bene rri'i caso bee bedichia' nze'ca' Diose, tucu nú uni profeta Isaías: “Diose Pa liñibe, ¿ti uchili arqui' stichia'lu nú rniru?”

<sup>17</sup> Enze'e lunú riene' bene nzeli arqui' bene, nu lunú riene' bene neca bedichia' nze'ca' Jesucristo.

<sup>18</sup> Nu, ¿xie' lasca' yene' bee bene Israel Stichia' Diose la? ¡Pero li'á nia luhua nú ubene'la' beellae! Xne lu ichi' Stichia' Diose rni:

Diqui lu iliulabe uri'chia letsela Stichia' Diose, nu hasta elu máse istu lu iliulabe ubene'la' bee bene stichia'nu.

<sup>19</sup> Neequie rri'á elliebacu': ¿Xie' nú la ri'i bee bene Israel beya' Stichia' Diose la? Pero li'á nia nú rri'i beella beya'e. Xne hasta hua'tu uquie'e Moisés nú uni Diose equie cuenda' beella chenu uninu:

Lil'á ri'á nú yiea arqui'hua lunú ri'á lubee bene enu laca bee bene Israel, nu lunú ri'á cuna li'ibeei mase nú lacabeei xi recahua, che leehua.

<sup>20</sup> Nu le'ca sin nú lliqui profeta Isaías uquie'ella lunú uni

Diose equie cuenda' bee bene Israel chenu uninu: Bee bene enu laca bee bene Israel mase nú né la'nabeei li'á pero ullela'beei li'á.

Nu ulubelua lubeei mase nú ni' né nedichia' beei li'á.

<sup>21</sup> Le'ca uquie'e profeta Isaías lunú uni Diose equie cuenda' bee bene Israel chenu uninu: “Debichia nzuquiea nú ye'tabeei lua, pero lá niarqui'beei azucu'beei nú rniaá nu rnibeei bee bedichia' nú necha neca equie cuendaa.”

# 11

*Bee bene Israel enu netsila'ala*

<sup>1</sup> La nia luhua nú utsana' arqui'la Diose bee bene Israel, xne lacane scua. Li'ihua nediyahua nú le'ca bene Israel necaa, nu le'ca leta bee familia' Abraham nzelaan equie nú nzelaan lubee familia' Benjamin. <sup>2</sup> Asta hua'tu ucañi Diose bee bene Israel nú aca beella bee bene'nu, enze'e la tsana' arqui'nu beella. A nchiucu' arqui'hua lu ichi' Stichia' Diose elu rni: Chenu uxanabitsi profeta Elías lu Diose equie cuenda' bee bene Israel chenu unilla: <sup>3</sup> "Diose Pa liñibe, udiñila beella ye bee profeta'lú, nu unitilula beella bee ecu'cu'lú. Nu stucutsia li'á uya'naa nu le'ca niarqui' beella nú úti beella li'á." <sup>4</sup> Pero ¿xi ucuaqui Diose lulla che? Li'inu ucuaquinu: "Uhuachulá achi mili bee bene para li'á enu lasca'li zuculliqui lu diose enu lee Baal." <sup>5</sup> Le'ca scua nucua'a chiucu chuna bee bene Israel enu rua'a arqui' Diose, nu ucañinu beella para nú aca beella bee bene'nu. <sup>6</sup> Nu equie nú uhua'a arqui' Diose beella, enze'e ucañinu beella, nu la necane equie nú xi rri'ibeella, xne tunu ucañi Diose beella equie nú xi rri'ibeella che la aca'e equie cuenda' nú ru'a arqui' Diose beella.

<sup>7</sup> Scua ungae. Bee bene Israel enu ucañi Diose, ullela'la'beella inziu' Diose equie nú nzeli arqui'beella li'inu. Pero beelá bee bene Israel lasca' llela' beella inziu' Diose, xne rla'na beella inziu' Diose tucu nú niarqui'tsiabeella, nu la cua'na beella Stichia' Diose tucu nú niarqui'nu, che uri'nu nú unga nziti arqui'beella. <sup>8</sup> Tucu nú nequie lu ichi' Stichia' Diose elu rni: "Uri'i Diose nú unga necabe elliebacu' beella, mase rlañi'

beella pero neca xi neca nú la lañi'beella, nu mase riene' beella pero neca xi neca nú la yene' beella", nu scua rri'ibeella hasta nee. <sup>9</sup> Le'ca uni David: Equie elubacu nze'ca' beeí nu eluxene'beeí nu-cua' sequienune arqui'beeí nú nehuañi nze'ca beeí,  
 nu zequienune arqui'beeí  
 para nú zeca beeí castiya nú rialabeei,  
<sup>10</sup> Nu cabe i'cu'lubeei xi necabe i'cu'lu tucu bene enu la ye'e lu,  
 nu zecabeei xi seca tucu bene enu leca xunga tsuxe nú nehuana seca.

### *Tsila'a bee bene enu laca bee bene Israel*

<sup>11</sup> La nia luhua nú lunú lá zela bee bene Israel ari'i tucu nú niarqui' Diose nú utilulabeella lu Diose, xne lacane scua. Lunú rnia luhua necane nú lá zucu' beella Stichia' Diose, che scua ulu'cu bee bene enu laca bee bene Israel nú xneca tsila'abeella, para nú scua yea arqui' bee bene Israel nu che nu' modo tsila'abeella. <sup>12</sup> Nee tunu lunú la zucu' bee bene Israel Stichia' Diose, uzibi' nucua' para nú yala beelá bee bene iliulabe eluxene' Diose, nu lunú uluachu beella lunú niarqui' Diose ri'ilubeella uzibi' nucua' para nú tsila'a bee bene enu laca bee bene Israel. ¡Chiqui' masesca'lá ñia ri'i Diose nú cha nze'ca lu cuenda' bee bene chenu zela bee bene Israel ri'i tucu nú niarqui' Diose nú ri'ibeella!

<sup>13</sup> Nia luhua bee bene enu laca bee bene Israel, scua tucu nú uxe'la Diose li'á luhua para nú ixile'a stichia'nu luhua, chiqui' rla'naa nú ri'á tucu nú riala nú ri'á, <sup>14</sup> para nú scua biase chu'u bee bene lachia Israel enu chiqui' niarqui' ri'i tucu nú rri'ihua, nu che tsila'abeella. <sup>15</sup> Neli nú equie nu

né zucu' bee bene Israel Stichia' Diose, scua uyu'u modo nú xneca atsila'a beelá bee bene. Pero, ¿chiqui' masesca'lá ñia neca chenu chili arqui' bee bene Israel Stichia' Diose? neca nucua' xi neca chenu rehuañi zeca tucu bene enu unguti. <sup>16</sup> Nu scua tucu nú uri'i Diose nú nza nze'cae lu cuenda' bee bene Israel enu udetela, nucua' neca tucu seña nú le'ca scua cha nze'cae lu cuenda' beelá bee bene Israel, le'ca scua tunu rri'i Diose nú nza nze'ca lu cuenda' luu tucu aca, nu chenu nza nze'cala luu aca cua', diquineca aca cua' nza nze'ca lu cuenda' che.

<sup>17</sup> Bee bene Israel neca beella xi neca tucu aca olivo, pero nu' beella enu neca xi neca ellutsa lue nú urecu', nu li'ilu enu laca bene Israel necalu xi neca tucu ellutsa' aca olivo ixi nú uyela' luhuare' ellutsaa nú urecu' lu aca olivo ze'e, chequie scua rlu'culu elunehuañi equie cuenda' luu aca ze'e. <sup>18</sup> Enze'e la tsilu nú maselálu lu ellutsa' aca olivo nú neca xi neca bee bene Israel. Pero tunu scua rri'ilu elliebacu', ullu'cu' arqui' nú laca li'ilu enu rdete' elunehuañi' luu aca ze'e sino que luu aca ze'e rliqui' elunehuañi'lu.

<sup>19</sup> Tal vez nilu: "Neli'lu nucua', pero bee ellutsaa lu aca olivo cua' urecu'e para nú yela'a luhuare'e nu acatucuncatsea cuna aca olivo cua'." <sup>20</sup> Neli'lu nucua', pero bee ellutsa' aca olivo nú rniru nú neca bee bene Israel urecu' bee xne la chili arquii nu li'ilu uyu'ulu luhuare'e equie nú nzeli arqui'lu Jesucristo, enze'e la aca nelliñalu sino mejora nú bi'ya li'ilu. <sup>21</sup> Xne tunu bee bene Israel enu neca xineca ellutsa lu aca olivo ze'e né hua'a arqui' Diose le'ca scua nu'beya' nú la hua'a arqui' Diose li'ilu. <sup>22</sup> Uri'i beya' nú nze'ca Diose, pero le'ca rri'inu elu usticia tucu nú

necane. Nu uri'ilanu elu usticia lubee bene enu la zucu' stichia'nu, nu uri'inu nú neca nze'ca lulu. Pero riala nú huañilu tucu nú niarqui' Diose nú huaña'ahua xne canule'ca ri'i Diose elu usticia'nu lulu. <sup>23</sup> Nu tunu bee bene Israel benchila' arqui'beella lu Diose nu chili arqui'beella Jesucristo che li'inu lu'cu cuendanu li'ibeella cuna beelá bee bene enu nzeli arqui' Jesucristo. Xne li'inu rlu'cunu poder para nú ri'inu nú acatucuncatse beella cuna beelá bee bene Israel. <sup>24</sup> Xne tunu li'ilu enu laca bene Israel necalu xi neca tucu ellutsaa aca olivo ixi nu unga tucunecatselu cuna aca olivo stila nú neca bee bene Israel, ¡xaquie nú la acane scua lubee bene Israel enu lá zucu' Stichia' Diose nú la aca tucunecatse beella stucu bese cuna beelá bee bene Israel, tunu zucu' beella Stichia' Diose!

### *Bee bene Israel tsila'a*

<sup>25</sup> Bee sa'a enu nzeli arquia'ahua Jesucristo nu' tucu nú la ri'ihua beya nu niarquia nú ri'ihua beya'e para nú la aca nellinahua: bee bene Israel enu reca nziti la niarqui' zucu' Stichia' Diose, scua recae hasta bichia nú laxu chili arqui' yebee bene enu laca bee bene Israel Stichia' Diose, bee enu rqui'ña nú chili arqui'. <sup>26</sup> Chenu ungalance scua che ye bee bene Israel ri'i caso Stichia' Diose. Nu scua tsila'a beella tucu nú nequie lu ichi' Stichia' Diose elu rni:

Eyeche Sión chiu'u tucu bene enu ri'i elietsa lubee  
bene enu nze'ta lu familia' tuxie Jacob,  
para nú tsana' arqui'beella nú necha neca  
rri'ibeella.

<sup>27</sup> Che yalu stichia'a tucu nú unila nú ria'á perdoná stula beella.

<sup>28</sup> Pero nee lunú reca nziti bee bene Israel nu lá chili arqui'beella bedichia' nze'ca' Jesucristo,

che scua nu' modo chili arqui'hua li'ihua enu laca bee bene Israel. Nu añinzuka nú scua necane pero secasca' Diose li'ibeella tucu nú ucuaqui u'nanu lubee bene'beella enu udetela. <sup>29</sup> Xne la che'e Diose elliebacu'nu, nu la yucunu lunú lia udetelnu lubee bene, nu le'ca la tsana' arqui'nu bee bene enu ucañilanu para li'inu. <sup>30</sup> Hua'tu li'ihua ne chenalahua Stichia' Diose. Pero nee equie cuenda' bee bene Israel enu la zucu' Stichia' Diose nee ulube'nu luhua nú rua'a arqui'nu li'ihua. <sup>31</sup> Nu tunu nee bee bene Israel la zucu' Stichia' Diose, recae scua para nú hua'a arqui' Diose li'ihua, pero le'ca riña bichia nú hua'a arqui'nu li'ibeella. <sup>32</sup> Uzela Diose nú sia bee bene Israel nu bee bene enu laca bene Israel la zucu' beella stichia'nu para nú hua'a arqui'nu beella.

<sup>33</sup> ¡Chiqui' llene neca eluxene' Diose cuna lunú recanu nu cuna lunú rri'nu beya! Lecati ri'ibeya' xa neca elliebacu' Diose urre lunú rri'nu, <sup>34</sup> tucu nú nequie lu ichi' Stichia' Diose elu rni: “¿Ti itá ri'i beya' nú xneca neca elliebacu' Pa'ahua Diose? ¿Ti máse reca para nú nii lu Diose nú xneca ri'nu?” <sup>35</sup> Urre, “¿ti udetelxi udetel lu Diose para nú nzuquie nze'e nú ixiunu lu nze'e?” <sup>36</sup> Yebee nú nu' neca stene'nu nu li'inu ureche'nue nu yeene necane para li'inu. Enze'e riala nú lu'cu bee bene ula'na lunu diqui tiembu. Amén.

## 12

### *Xa niarqui' Diose nú huañi bee bene*

<sup>1</sup> Enze'e, bee sa'a enu nzeli arquia'ahua Jesucristo, sequia nu nacua luhua, nú scua tucu nú uhua'a arqui' Diose lia'ahua, ude'tecuendahua

li'ihuá lu Diose xi neca tucu u'na nú nehuañi nú lecaxina nu riu' arqui' Diose. Para nú huañihua tucu nú niarqui'nu nú huañihua nu scua riala lu'cuhua ula'na lunu. <sup>2</sup> La huañihua xi nehuañi beelá bee bene enu nucua'a tiembu quie', mejora uche'ehua elliebacu'hua para nú scua che'e nú xneca nehuañihua nu scua ri'ihuá beya' nú xneca niarqui' Diose nú huañihua. Nu le'ca scua ri'ihuá beya' ta nú neca nze'ca nu ta nú riu' arqui' Diose, nu ta nú riala ri'ihuá.

<sup>3</sup> Equie nú seca Diose li'á enze'e ucañinu li'á, nu uxe'lanu li'á para nú ixiole'a stichia'nu luhua. Enze'e nialuhua, ni'tucuhua la aca nelliñiahua nú másela neca equiehua lubeelá bee bene. Mejora uri'ihuá elliebacu' nze'ca equie cuenda'tsiahua tucu nú necane nu tucu nú uliqui' Diose elliebacu' lu cada tucuhua. <sup>4</sup> Xne scua tucu nú neca cuerpo' bene nú huaxi parte necane pero laca yeene sibil'i ihuale. <sup>5</sup> Le'ca scua lia'ahua enu nzeli arquia'ahua Jesucristo mase nú huaxia'ahua pero lunú nzeli arquia'ahua Jesucristo scua neca tucunecatse'ahua cuna li'inu, xne cada tucua'ahua ria'ahua lunú riala ria'ahua para nú ria'ahua elietsa lubee sa'ahua. <sup>6</sup> Nu cada tucua'ahua urene elliebacu' uliqui' Diose lua'ahua tucu nú uninu nú reca'ahua. Enze'e tunu uliqui'la Diose nú nia'ahua stichia'nu, rqui'ña nú nia'ahua stichia'nu lubee bene, equie nú nzeli arquia'ahua li'inu. <sup>7</sup> Tunu uliqui' Diose elliebacu' nú zibi'ahua lubee sa'ahua uri'ihuá tucu nú necane, nu enu udete' Diose elliebacu' para nú zete' stichia'nu lubee bene rqui'ña nú zete'lla stichia'nu lubee bene. <sup>8</sup> Nu tunu necane nú udete'nu elliebacu' lulla nú nilla lubee bene

rqui'ñña nū scua ri'illa. Nu tunu udete'nu elliebacu' nū xi lia dete'lla lubee bene la tsuquiella nū xi ati'lla, nu enu dete'nu elliebacu' nū nibiya' rqui'ñña nū bi'yalla xa nibiya'lla tucu nū rialane, nu enu udete'nu nū ri'i elietsa lubee bene enu seca elitsi rqui'ñña nū ñia nzu arqui'lla ri'illae.

*Xa riala huañi bee bene enu nzeli arqui' Jesucristo*

<sup>9</sup> Uzecahua bee sa'hua nu la ri'ihua nū lia ri'itsiahuanu uluachuhua nū necha rri'ihua, nu uri'ihua nū neca nze'ca. <sup>10</sup> Diquinu' arqui'hua uzecahua bee sa'hua xi neca tucu bichi-hua nu la zucu' ayahua li'ihua, nu ulu'cuhua ula'na lusa'hua.

<sup>11</sup> La nebichiuhua lunú rri'ihua uri'ihua lunú riala ri'ihua, diquinu' arqui'hua xne lu Jesucristo neca enu sibi'hua. <sup>12</sup> Ñia utsu arqui'hua uhuañihua lunú nzuquie arqui'hua, nu uriqui'hua lunú nehuana secahua nu la lliquihua, nu la tsana' arqui'hua nū rnacu'hua lu Diose. <sup>13</sup> Uri'ihua elietsa lubee sa'ahua enu nzeli arqui' Jesucristo chenu nu' xi secala'cha'beella nu xi rqui'ñña beella, uri'ihua elietsa lubeella. Nu chenu nu' ti rriña ni'hua uri'i nze'cahua lubeella.

<sup>14</sup> Una'cu'hua lu Diose equie cuenda' bee bene enu necha rri'inu li'ihua nu le'ca una'cuhua nū cha nze'cae lu cuenda' beella nu la i'ñahua nū xi zeca beella.

<sup>15</sup> Ñia utsu arqui'hua cuna bee bene enu ñia nzu arqui', nu bee bene enu nehuana nzu arqui' ulube'hua lubeella nū le'ca nehuana nzu arqui'hua cuna li'ibeella.

**16** Uhuañi nze'cahua cuna beelá bee bene, nu la aca nelliñiahua sino que uquie'te'hua ye bee bene, nu la ts'i'huá nú recasca'lahua lubeelá bee sa'huá.

**17** La duse'ehua nú necha neca lubee bene enu rri'i nú necha neca luhua, nu ubi'yahua nú ri'ihua nú neca nze'ca lu ye bee bene. **18** Ula'nahua nú chiqui'sca'lá huáñi nze'cahua nu la liunuhua bee bene. **19** Bee sa'a enu nzeli arquia'ahua Jesucristo la duse'ehua nú necha rri'inu bee bene li'ihua mejora uzelahua nú Diose dete' castiya lubeella, tucu nú rni lu ichi' Stichia' Diose elu rni: "Li'á riala ri'á elu usticia nu detea castiya lulla. Scua uni Diose Pa liñibe." **20** Le'ca uninu: "Tunu bene enu rle lulu rlia'na' ude'te' nū aculla, nu tunu rrebichi'lla ude'te' nū hue'lla, xne scua lañi'lu nū chiqui' tu'lla." **21** La zelalu nū ri'i nū necha neca ana lulu mejora uri'i nū neca nze'ca para nū ri'ilu ana lunú necha neca.

## 13

**1** Yebee bene rqui'ña nū zucu' nū rnibee usticia cuna ubierno. Xne Diose udu' bee usticia cuna ubierno, nu li'inu rdete'nu elurnibiya' nū rlu'cubeella. **2** Enze'e bee bene enu la zucu' nū rni bee usticia le'ca la zucu'beei nū rni Stichia' Diose nu bee bene enu rri'i scua le'ca li'ibeei rla'na beei nū zeca beei castiya. **3** Xne bee usticia la nucua'a beella para nū dete' beella castiya lubee bene enu lecaxi ri'i, xne nucua'a beella para nū dete' beella castiya lubee bene enu necha rri'i, nu tunu la niarqui'lu nū ri'chia usticia li'ilu rqui'ña nū ri'i nze'calu, nu scua la ri'chia usticia li'ilu. **4** Xne scua sibi' beella lu Diose para nū acanu'beella li'ilu. Pero tunu rri'ilu nū necha neca, che xiquilu bee usticia xne la neca nū lia rlu'cu beella elurnibiya'

sino que scua sibi' beella lu Diose para nú dete' beella castiya bee bene enu necha rri'i. <sup>5</sup> Enze'e rqui'ña nú zucu' bee bene nú rni bee usticia nu la acatsiae equie nú xiquibeella nú zeca beella castiya, sino que nediy'a' beella nú scua riala ri'ibeella. <sup>6</sup> Nu le'ca udixiuhua impuesto para nú nzenibiya'la bee usticia, xne Diose udu' li'ibeella para nú nibiya' beella nu scua sibi' beella lu Diose.

<sup>7</sup> Enze'e ude'te'hua nú riala dete'hua, tunu riala nú dete'hua melu, ude'te'hua melu, nu tunu riala ixihuahua impuesto, udixiuhua impuesto. Nu uzu'cu'hua nú rni bee bene enu riala zucu'hua nú rni, nu ulu'cuahua ula'na lubee enu riala nú lu'cuahua ula'na lu.

<sup>8</sup> La aca nezi'quihua lubee bene, nu lunú la yala tsana' arqui'hua neca nú zecahua bee sa'hua. Xne bee bene enu secasa', scua sucu' bee nze'e ye nú rnibiya' ley' Diose. <sup>9</sup> Xne bene enu sucu' mandamiento' Diose nú rni: "Uzeca sa'lu tucu nú secalu li'ilu." Enu sucu' mandamiento quie', sucu'la beelá bee mandamiento nú rni: "La ri'ilu eluhuexe, la utilu bene, la ri'ilu eluhuana', la le'lú stene' sa'lu." <sup>10</sup> Xne bene enu seca sa' la ri'illa nú necha neca lubeelá bee bene, enze'e bene enu seca sa' sucu'lalla ye nú rnibiya' ley' Diose.

<sup>11</sup> Nu le'ca uri'ihua beya' xi tiempo nellua'ahua, nu uri'ihua beya' nú necala hora nú dete'ahua ellie'e. Xne nze'ta riñala bichia nú riña zeca Jesucristo stucu bese nu la lea' nú riña zecanu xi neca bichia chenu uchili arquia'ahua li'inu. <sup>12</sup> Nze laxu tiempo, nu nze'ta riñala bee bichia nú riña zecanu, enze'e rqui'ña nú tsana' arquia'ahua inziu nú necha neca nzenala'ahua nu ria'ahua puro nú neca nze'ca para nú chenala'ahua inziu

nze'ca. <sup>13</sup> Rqui'ña nú huañi nze'ca'ahua, nu la ria'ahua beenú netú neca. Nu la yala nú aca'ahua uníqui nu la ria'ahua eliñi para nú chu'u modo nú ria'ahua lunú la yala ria'ahua. Nu la yala nú ria'ahua eluhuexeurre xitse stucu bee vicio, nu la yala nú liu'ahua, nu la yala nú yea arquia'ahua lu sa'ahua. <sup>14</sup> Sino que mejora uhuañihua tucu nú niarqui' Jesucristo nú huañihua, nu la yala nú huañihua lunú necha neca riu' arqui'hua.

## 14

### *La ze'ta bene sa'bene enu apenatsia nzeli arqui' Jesucristo*

<sup>1</sup> Uri'i nze'cahualu tucu bene enu apenatsia uchili arqui' Jesucristonu la liu ru'uhua cuna li'illa, tunu la ri'illa elliebacu' tucu nú rri'ihua elliebacu'. <sup>2</sup> Xne nu' bee bene enu nzeli arqui' Jesucristoseca nú nu' beya' acu bene xitse pero nu'bee enu apenatsia nzeli arqui' Jesucristo, seca nú ñialá nú acu bene purotsia bee verdura para nú la aculla beenú la yala aculla. <sup>3</sup> Pero bene enu seca nú nu' beya' acu bene xitse, la yala nú huachulla bene enu seca nú la yala acu bene xitse. Nu bene enu seca nú nu' beenú la yala acu bene, la yala nú ze'ta bene bene enu racu ye nú racu, xne tucutse bene' Diose neca beella. <sup>4</sup> Enze'e, ¿ti neca bene nú ze'ta bene sa'bene enu nzeli arqui' Jesucristo equie cuenda'bee nucua'? Xne Diose nediya'tunu rri'i nzeca bene nu tunu la ri'i nze'ca bene. Nu tunu lasca' ri'i bene beya' nú xneca ri'illa, che Jesucristo rlu'cu poder para nú ri'inu elietsa lulla para nú ri'illa lunú riala ri'illa.

<sup>5</sup> Le'ca scua nu' bee sa'ahua enu nzeli arqui' Jesucristo seca nú nu' bee bichia cachi nú la yala ri'i bene riña' nu nu' bee enu seca nú ye bee bichia ihuale neca. Pero lecaxi ri'i nucua' xne cada nú nzeli arqui' cada tucu bene. <sup>6</sup> Xne bene enu seca nú nu' bichia cachi nú la yala ri'i bene riña' rri'illa scua para nú lu'culla ula'na lu Diose. Nu bene enu seca nú ye bee bichia iguale neca, le'ca rlu'culla ula'na lu Diose. Nu bene enu racu ye nú racu, racullae xne nediya'lla nú Diose uliqu'i, nu rdete'lla che'tsa lunu equie cuenda'e. Nu bene enu seca nú nu' elubacu nú la yala acu bee bene, rri'illa scua xne secalla nú scua rlu'culla ula'na lu Diose nu le'ca rdete'lla che'tsa lu Diose.

<sup>7</sup> Ni' tucua'ahua la nehuañia'ahua lunú niarqui'tsia'ahua, nu le'ca la atia'ahua equie nú niarqui'tsia'ahua. <sup>8</sup> Tunu nehuañia'ahua, equie cuenda' Jesucristo nehuañia'ahua nu para li'inu nehuañia'ahua, nu tunu atia'ahua, equie cuenda' Jesucristo atia'ahua nu para li'inu atia'ahua, enze'e tunu nehuañia'ahua urre atia'ahua necala'ahua para Jesucristo. <sup>9</sup> Xne para enze'e unguti Jesucristo nu uhuañi zecanu, para nú nibiya'nu sia lubee bene enu nehuañi nu sia lubee bene enu unguti. <sup>10</sup> Enze'e, ¿xiquiero nú se'talu nu rluachulu bee sa'lú enu nzeli arqui' Jesucristo? Nu ye'ahua riña'ahua ante Diose para nú lualunue lu cuenda'ahua. <sup>11</sup> Xne lu ichi' Stichia' Diose rni: Nu li'á enu neca Diose enu nehuañi nia luhua nú ye bee bene zucu lliqui lua.  
Nu ye bee bene ni nú li'á necaa Diose, scua uni Diose.

<sup>12</sup> Nu cada tucua'ahua dete'ahua cuenda lu Diose lunú xi uri'i cada tucua'ahua.

*La zelahua nú zana' sa'hua enu nzeli arqui' Jesucristo lu dula*

<sup>13</sup> Enze'e, la yala ze'ta'ahua bee sa'ahua enu nzeli arqui' Jesucristo mejora te bi'ya'ahua lia'ahua nú la yala nú ria'ahua nú ri'i stucu bene dula. <sup>14</sup> Nu lunú necaa bene' Jesucristo, nediya nze'caa nú lacane dula nú racu bene xitse pero para bene enu seca nú leca modo nú acu bene xitse, para li'illa necane dula tunu raculla xitse. <sup>15</sup> Neequie tunu equie cuenda' beenú raculu seca sa'lú enu nzeli arqui' Jesucristo nú dula neca nú rri'ilu, nu tunu la ri'icasululla che neca nú la zecalu li'illa ubi'ya para nú la ri'i nú raculu nú ri'i sa'lú dula, xne le'canuu equie cuenda'lla unguti Jesucristo lu cruse. <sup>16</sup> Enze'e la ri'ilu xi ri'ilu para nú la ze'ta bee sa'lú li'ilu añinzuka nú li'ilu nediya'lu nú neca nze'ca nú rri'ilu. <sup>17</sup> Xne lu Diose la neca equie cuenda' nú racu bene urre equie cuenda' nú rue'e bene nú másela seca, sino que lunú máse seca ante Diose necane nú huañi bene tucu nú riala nú huañi bene nú huañilla sin xuu nu ñia nzu arqui'lla equie cuenda' Espíritu Santo. <sup>18</sup> Nu bene enu nehuañi scua equie nú nzenalalla Jesucristo, sucu'lla tucu nú niarqui' Diose, nu tucu nú riu' arqui' bee bene.

<sup>19</sup> Enze'e rqui'ña nú la'na'ahua nú huañi nze'ca'ahua cuna bee sa'ahua sin xuu para nú nzeri'ila'ahua beya' xneca riala chenala'ahua inziu' Diose. <sup>20</sup> Bi'yahua xne canú equietsia beenú racuhua ri'ihua nú ri'i bee sa'hua dula, neli nú nu' beya' acu bene ye nú nu' pero lunú necha neca tunu para sa'lú enu nzeli arqui' Jesucristo neca dula lunú raculu rnitolulu li'illa che. <sup>21</sup> Enze'e tunu

nu'bee sa'lú enu nzeli arqui' Jesucristo seca nú necha neca tunu acu bene mii nu le'ca necha neca nú hue' bene viñiu urre stucu nú rene, mejora la acu bene nu la hue' bene ante lulla para nú la ri'ilu nú ri'illa dula. <sup>22</sup> Añinzuka nú li'ilu nediyal'lu nú lecaxi neca nú acu bene xitse, pero mejora li'itsialu cuna Diose nediyal'lu nucua'. Li'á nia nú ñia neca lu cuenda' bene enu racu xitse sin nú za' arqui'lla. <sup>23</sup> Pero bene enu sa' arqui' equie nú racu, xne tunu para li'illa dula neca nú acullae nu racullae chequie e'cuñialla rri'illa dula equie nú rri'illa elliebacu' nú la neca nze'ca nú rri'illa. Ye nú rri'illa nu sa' arqui'lla chenu rri'illae rri'illa dula che.

## 15

### *Rqui'ña nú ria'ahua lunú riu' arqui' sa'ahua*

<sup>1</sup> Lia'ahua enu nzuta' arquia'ahua lunú nzeli arquia'ahua Jesucristo rqui'ña nú ria'ahua elietsa lubee bene enu lasca' tsuta' arqui' lunú nzeli arqui' Jesucristo luhuare nú ria'ahua lunú niarqui'tsia'ahua. <sup>2</sup> Sino que ye'ahua rqui'ña nú la'na'ahua nú ñia tsu arqui' bee sa'ahua. Nu rqui'ña nú ria'ahua lunú seca beella nú neca nze'ca, para nú ria'ahua elietsa lubeella nú nzeri'ilábeella beya' xneca riala chenala beella inziu' Diose. <sup>3</sup> Xne ni' Jesucristo né ri'i tucu nú niarqui'tsianu sino que unga tucu nú nequie lu ichi' Stichia' Diose elu rni: "Li'á uyucu'a ye bee bedichia' chi'qui' nú riala ni bee bene lulu." <sup>4</sup> Ye nú nequie lu ichi' Stichia' Diose hasta hua'tu nequiene para nú ria'ahua beya' xneca huañia'ahua, nu equie cuenda' Stichia'

Diose nze'ta nú rlu'cua'ahua paciencia, nu la llaca'ahua telluaquie'ahua lunú nelluaquie'ahua nú atia'ahua. <sup>5</sup> Diose enu rri'i nú rlu'cua'ahua paciencia, nu rri'i elietsa lua'ahua para nú la llaca'ahua, li'inu ri'inu elietsa luhua para nú huañihua nu aca tucunecatsehua cuna beelá bee sa'ahua tucu nú urí'i Jesucristo. <sup>6</sup> Para nú yehua tucutse nihua bedichia' nze'ca lu Diose, pa' Jesucristo.

*Riene' bee bene enu laca bee bene Israel Stichia'  
Diose*

<sup>7</sup> Enze'e scua tucu nú uyucu Jesucristo li'ihua nú necahua bee bene'nu, le'ca scua uri'ihua lu ye bee sa'hua enu nzeli arqui' Jesucristo, equie nú rlu'cuahua ula'na lu Diose. <sup>8</sup> Nia luhua nú ube'ta Jesucristo lu iliulabe para nú uzete'nu Stichia' Diose lubee bene Israel nu scua ube'tanu uzibi'nu lubeella che scua uyalu tucu nú ucuaqui u'na Diose lubee bene'ahua enu udetela nu scua unga achee nú Diose sí sa'alunu stichia'nu. <sup>9</sup> Nu le'ca ube'ta Jesucristo lu iliulabe para nú equie cuenda'nu nu'bbee bene enu laca bee bene Israel nibeella bedichia' nze'ca lu Diose xne rua'a arqui'nu li'ibeella, tucu nú nequie lu ichi' Stichia' Diose elu rni:

Hasta lubee bene enu laca bee bene Israel nia nú ñia nze'calu,

nu le'ca ulaa bee canto nu ñia ni lu cuenda'lú.

<sup>10</sup> Le'ca rni stucu luhuare Stichia' Diose:

Li'ihua enu laca bee bene Israel,

ñia utsu arqui'hua tucu nú ñia nzu arqui' bee bene Israel.

<sup>11</sup> Nu stucu luhuare Stichia' Diose rni:

Ye bee bene enu laca bee bene Israel uni'hua bee bedichia' nze'ca lu Diose Pa liñibe.

Cuna yebeelá bee bene iliulabe,  
uni'hua bee bedichia' nze'ca lunu.

**12** Le'ca uni profeta Isaías:

Lu familia' Isaí chiu'u tucu bene enu nibiya' lubee  
bene iliulabe,  
nu hasta bee bene enu laca bee bene Israel chili  
arqui' li'inu.

**13** Diose enu rri'i elietsa lua'ahua nú nzeli arquia'ahua, ri'inu nú ñia nzu arqui'hua nu ri'inu nú  
nzuxe arqui'hua lubee sa'hua xne nzeli arqui'hua  
li'inu, nu equie cuenda' Espíritu Santo chiqui' nu-  
cua'aquiehua lunú liqui'nu lua'ahua.

**14** Bee sa'a enu nzeli arquia'ahua Jesucristo li'á  
nediyaa nze'caa nú rri'i nze'cahuia lubee sa'hua,  
nu chiqui' recahua hasta rnihuare bezete' lubee  
sa'hua nu sete'hua bee sa'hua. **15** Añinzuca nú  
scua nu'bee luhuare lu carta quie' uquie'a bee  
bedichia' nú juerte rcu arqui'hua unia luhua nú  
xneca huañihua nu li'á rnia scua luhua equie  
cuenda' poder' Diose nú uliqui'nu lua. **16** Para  
nú zibi'a lu Jesucristo nu ixiole'a bedichia' nze'ca'  
Diose lubee bene enu laca bee bene Israel para nú  
huañibeella tucu nú niarqui' Diose nú huañi beella,  
nu la lu'cu beella dula ante Diose equie cuenda'  
Espíritu Santo.

**17** Nu xiquie nú rni nze'caa lu cuendaa como  
bene' Jesucristo nú necaa equie nú sibi'a lu Diose,  
**18** pero lecaxi aca nia nu rri'á tunu leca nú rri'i  
Jesucristo elietsa lua, xne li'inu rri'inu elietsa  
lua para nú ri'á elietsa lubee bene enu laca bee  
bene Israel para nú chili arqui'beella Diose nu  
zucu' beella stichia'nu, nú nzelila arqui'beella,  
equie nú unila lubeella nu lunú rlañi' beella xneca

nehuaña. <sup>19</sup> Nu le'ca xne ulañi'la'hua ye bee milagro cuna ye beenú uyanu arqui'hua unga equie cuenda' Espíritu Santo. Che scua udixiule'a bee bedichia' nze'ca' Jesucristo yebee luhuare, desde Jerusalén nu hasta lu iliu nú lee Ilírico. <sup>20</sup> Xne scua neca elliebacu' nú rri'á, nú ixiule'a bedichia' nze'ca' Jesucristo. Pero la ixiule'ene elu uquixie rixiule'ela benene sino que rixiule'ene elu lasca'lí yene' bene equie cuenda' stichia' Jesucristo. <sup>21</sup> Tucu nú nequie lu ichi' Stichia' Diose elu rní:

Bee bene enu lasca' yene' equie cuenda'nu chulu beella li'inu,  
nu bee bene enu lasca' ri'i beya' equie cuenda'nu  
ri'i beella beya'.

### *Uri'i Pablo elliebacu' nú nzalla Roma*

<sup>22</sup> Lunu uya'a ye bee luhuare elu unila luhua nú nza'a enze'e lá llucha'a ayelabi'ya li'ihua añinzuca nú huaxi bese uniarquia ayelabi'ya li'ihua. <sup>23</sup> Pero nee lunú ula'xulá rixiule'a Stichia' Diose ye bee luhuare ca'a nu como hasta hua'tu niarquia nzelabili'ya li'ihua, <sup>24</sup> enze'e nee rri'á elliebacu' nú nzelabili'ya li'ihua chenu nza'a España. Nu chenu nzelabili'ya li'ihua, nu chenu udetela bee bichia nú ñia nzu arquia nú ubelabi'ya li'ihua, che ri'ihua elietsaa nú nza'a España. <sup>25</sup> Pero nee rluti nza'xua Jerusalén nzeyua elietsa lubee sa'ahua enu nzeli arqui' Jesucristo nucua'a ze'e. <sup>26</sup> Xne bee bene lu iliu Macedonia cuna bee bene lu iliu Acaya enu nzeli arqui' Jesucristo uri'i beella elliebacu' nú quiete' sa'beella melu nú dete' beella lubee bene enu seca elitsi nucua'a Jerusalén, enu le'ca nzeli arqui' Jesucristo. <sup>27</sup> Nu elliebacu' e'cubeella

uchiu'u nú xe'la beella elietsa cua', añinzuca nú scua riala ri'ibeella lubee bene Israel xne neca xi neca nú nezil'qui beella lubee bene Israel xne equie cuenda' bee bene Israel uriña Stichia' Diose lubeella, nu nee li'ibeella enu laca bee bene Israel, neca nze'cae nú ri'i beella elietsa lubee bene Israel cuna lunú rlu'cu beella. <sup>28</sup> Enze'e chenu la'xua lunú rri'á nu detecuendaa elietsa cua' lubeella, che nza'a España nu chenu dete'a lachihua che nzelabi'ya li'ihua. <sup>29</sup> Li'á nediyá nze'ca nu chenu nzelabi'ya li'ihua nu' huaxi nú nia luhua equie cuenda' Jesucristo.

<sup>30</sup> Nee equie nú ye'la'ahua se'cala'ahua Jesucristo, nu equie nú seca Espíritu Santo lia'ahua nacua luhua nú ri'ihua elietsa lua nacua'ahua lu Diose equie cuendaa. <sup>31</sup> Na'cuhua lu Diose nú ri'inu elietsa lua chenu nzua leta bee bene Judea enu lá chili arqui' Jesucristo, nu le'ca na'cuhua lunu nú bee sa'ahua enu nzeli arqui' Jesucristo bee enu nucua'a Jerusalén, yucu beella elietsa nú nza'a nzetsa'na para li'ibeella. <sup>32</sup> Enze'e tunu zela Diose nú acane scua che ñia nzu arquia nzelabi'ya li'ihua, che nu' beya' tselachia diquila nú nzua cuna li'ihua. <sup>33</sup> Nu Pa'ahua Diose enu rliqui' nú nzuxe arquia'ahua nzu cuna li'ihua. Amén.

## 16

### *Uxe'la Pablo saludo*

<sup>1</sup> Nee nú nza Febe lachihua una'a enu neca sa'ahua enu nzeli arqui' Jesucristo, nu sibi'lla li'ñi Indu nú nzucu eyeche Cencrea. <sup>2</sup> Uyucu nze'cahualla lu cuenda' Jesucristo, tucu nú riala nú ria'ahua lubee sa'ahua enu nzeli arqui' Jesucristo. Le'ca uri'ihua elietsa lulla lu xitse

nú rqui'ñalla, xne chiqui' uri'illa elietsa lu huaxi bee bene nu le'ca uri'illa elietsa lua. <sup>3</sup> Uri'ihua saludar Aquila cuna una'lla Priscila, li'ibeella enu rri'i elietsa lua, nú rxiule'eru stichia' Jesucristo. <sup>4</sup> Li'ibeella enu hasta uniarqui' ati equie cuendaa para nú la atia, enze'e rdetea che'tsa lubeella. Nu la necane nú li'itsia rdetea che'tsa lubeella. Le'canu bee sa'ahua enu nzeli arqui' Jesucristo enu laca bee bene Israel rdete' che'tsa lubeella. <sup>5</sup> Uri'ihua saludar bee sa'ahua enu nzeli arqui' Jesucristo, li'ibeella enu riete'sa' ni'i Priscila nu Aquila uri'ihua saludar Epeneto enu rquietea, enu rlutilá uchili arqui' Jesucristo lu iliu Asia. <sup>6</sup> Uri'ihua saludar María, li'illa enu chiqui' uri'i elietsa luhua. <sup>7</sup> Uri'ihua saludar bee bene lachia Adrónico nu Junias, enu ullutsenua ni'cu'. Nu chiqui' seca bee Apóstol li'ibeella, nu rlutilá beella uchili arqui'beella Jesucristo luquela li'á.

<sup>8</sup> Le'ca uri'ihua saludar bene enu lee Amplias enu rquietea enu chiqui' se'ca, lunú necaru bene' Jesucristo. <sup>9</sup> Uri'ihua saludar Urbano enu rri'i elietsa lua nú sibi'a lu Jesucristo. Le'ca uri'ihua saludar bene enu rquietea lee Estaquis. <sup>10</sup> Uri'ihua saludar Apeles enu ulube' nú neli nzeli arqui' Jesucristo, nu le'ca uri'ihua saludar familia' Aristóbulo. <sup>11</sup> Uri'ihua saludar bene lachia enu lee Herodión, nu le'ca uri'ihua saludar familia' Narciso, li'ibeella enu le'ca nzeli arqui' Jesucristo. <sup>12</sup> Uri'ihua saludar Trifena cuna Trifosa, bee una'a enu sibi' lu Jesucristo. Le'ca uri'ihua saludar Pérsida, una'a enu nediy'a'ahua nú chiqui' uzibi' lu Jesucristo. <sup>13</sup> Uri'ihua saludar Rufu, enu neli nzeli arqui' Diose nu le'ca uri'ihua saludar na'lla, bene enu se'caa tucu nú se'caa naa. <sup>14</sup> Uri'ihua saludar

Asíncrito, nu Flegonte, Hermas, Patrobas, Hermes cuna beelá bee bene enu nucua'a cuna li'ibeella enu le'ca nzeli arqui' Jesucristo. <sup>15</sup> Uri'ihua saludar Filólogo, Julia nu Nero nu cuna zanalla, nu le'ca uri'ihua saludar Olimpas cuna beelá bee bene enu nucua'anu beella, enu le'ca nzeli arqui' Jesucristo.

<sup>16</sup> Nu li'á nia luhua: Nú uni'hua Diose lubee sa'hua tucu nú riala nú ri'ihua, nu ca'a yebee sa'ahua enu nzeli arqui' Jesucristo xe'labeella saludo luhua.

<sup>17</sup> Bee sa'a enu nzeli arquia'ahua Jesucristo zequiaa nu nacua luhua, nú bi'yahua li'ihua lubee bene enu rri'i nú rle'esa'a bee bene, nu sequienubeei bee bene. Xne urene sete'beei bee bene luquelá nú ungahua nu la ri'icasohua beei. <sup>18</sup> Xne li'ibeei la zibi'beei lu Jesucristo, nu li'ibeei rri'ibeei lunú niarqui'tsiabeei, nu cuna bee bedichia' nú ñiase nu cuna bee bedichia' nze'ca nú rnibeei rri'ibeei ana bee bene enu la chulu Stichia' Diose, urre bee bene enu apena uchili arqui' stichianu. <sup>19</sup> Pero yebee luhuare nediyá' bee bene nú neli sucu'hua Stichia' Diose nu nzenalahuane nu ñia nzu arquia, nu niarquia nú cua'atsiñahua ri'ihua nú neca nze'ca nu ubi'yahua li'ihua para nú la ri'ihua nú necha neca. <sup>20</sup> Diose enu rri'i nú nzuxe arquia'ahua lí'inu ri'inu elietsa luhua para nú la ria' beze'lu ana luhua nú ria'ahua dula nu Jesucristo enu rnibiya' ri'i nú cha nze'ca lu cuenda'ahua.

<sup>21</sup> Timoteo enu rri'i elietsa lua, nú rixiule'eru Stichia' Diose xe'lalla saludo luhua, le'ca esquie bee bene lachia enu lee Lucio, nu Jasón, nu Sosípater xe'la saludo luhua.

**22** Tercio enu rquie'e stichia'a lu carta quie' le'ca xe'lalla saludo luhua equie cuenda' Jesucristo.  
**23** Le'ca xe'la Gayo saludo luhua, nu ni'lla nzucua'a nu le'ca sana'lla ni'lla riete'sa' ye bee sa'ahua enu nzeli arqui' Jesucristo. Nu Erasto enu neca Tesorero eyeche quie' cuna sa'ahua enu nzeli arqui' Jesucristo lee Cuarto xe'labeella saludo luhua.

**24** Nu Jesucristo ri'i nú cha nze'ca lu cuenda' yehua. Amén.

*Nzelaxula nú rni Pablo lu carta quie'*

**25** Dete'ahua che'tsa lu Diose xne rri'inu elietsa luhua, nú nze acaláhua nu nzeri'iláhua beya' lunú nzuta' arqui'hua lu bedichia' nze'ca' Jesucristo, tucu nú uzetela li'ihua nú xneca tsila'ahua, xne scua neca elliebacu' Diose hasta chenu lasca' quixie iliulabe, elliebacu' nú lá ri'i bee bene beya' desde chenu uquixie iliulabe. **26** Pero nee nediya'la'ahua elliebacu' Diose nu uri'ila'ahua beya' equie cuenda' ichi' nú uquie'e bee profeta tucu nú unibiya' Diose lubeella enu rlu'cu elunehuañi nú la laxu nu ye bee luhuare riene' bee bene Stichia' Diose, nú uquie'e bee profeta para nú chili arqui' bee bene Jesucristo nu zucu' bee bene stichia'nú. **27** Tucutsia Diose enu reca yeene. ¡Chiqui' riala nú lu'cua'ahua ula'na lunu, ye tiembu equie cuenda' Jesucristo! Amén.

**Stichia' Diose dialu  
New Testament in Zapotec, Lachixío (MX:zpl:Zapotec,  
Lachixío)**

copyright © 2010 Wycliffe Bible Translators, Inc.

Language: Zapotec, Lachixío

Translation by: Wycliffe Bible Translators, Inc.

**Copyright Information**

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Lachixio

**© 2010, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

liv

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
02e1d067-9a9e-5eaa-95ee-252d3e10ce13